

خـذلان

(رواية)

تأليف

منة الله هشام



للتـنـشـر والـحـوزـة

اسم الكتاب/ خذلان - رواية

الكاتبة / منة الله هشام

الطبعة الأولى 2019

تصميم الغلاف : Sandoby Design

المراجعة اللغوية : هند خطاب

رقم الإيداع : 2019/19242

الترقيم الدولي: 6 - 52 - 6727 - 977 - 978

التصنيف: رواية

الناشر : السعيد للنشر والتوزيع

المدير : لمياء السعيد

برج الهادي - الدور الأول - 36 ش عبد الحميد الديب - شبرا مصر

01550096215 - 0222017260

elsaidpublisher@gmail.com



إهداء إلى  

الصبورة حاملة الآلام التي أنارت قلبي منذ ولادتي
وما زال قلبي ينير بوجودها به
رحمك الله وأسكنك جنته يا أمي
وخفف وجع الكيمأوي علي كل جسد عاني منه
ليجعله الله بميزان حسناتكم



فـذـلـان

كل ما مررت به سيمضى وإن لم يمضى ستوقف روحك
عنده وتمضى أنت جسداً بلا روح

إنظرت وجوده اليوم مثل السنة الماضية إشتهيت حضنه
الكاذب وكنت أنتظر (أنا هنا) وهو بعد مما يكن من أن يكون
هنا، هو باقي بقلبي وأنا لا أخطر بباله، كان يظن دائماً أنني لست
علي دراية بما يحمله لي بل أعلم أنه لم يحمل نصف الحب
الذى بداخلي، لم يحمل حتى ذره صغيره مما غرس بقلبي، ما
لم أكن أعلمه أنه سيكون سبب إستيائي كنت أجهل أنه
الخدلان بعد العشم، لا أعلم لما تعشمت به كثيراً! هل هو بارع
بالخداع إلى هذا الحد ام أنا أحببته لحد الغفلة؟

مضى ثلاث سنوات علي أول لقاء بيننا، توهمت إنني مقبله
علي سعادتي حين إلتقيت به لم أكن أعلم أنى سأستوطن
الهلاك، ها أنا الآن وحيدة بدونه، فاقدة أمي، منهكة ولا أدري
كيف أستكمل طريقي..

أتي إلى في يوم ليقدم لإبنته بروضة الأطفال التي أمتلكها
كانت حلم عمري سعيت كثيرا لتحقيقه بات الآن أكثر الاماكن
وجعاً لا يذكرني إلا بما فقدت، فقدت الكثير لأجله وبسببه،
كنت أجلس داخل مكثبي فطرق بابي ليسأل...

أستاذة ياسمين؟

أيوه اتفضل؟

أنا يوسف جيلك من طرف مدام غاده كانت كلمتك
بخصوص بنتي

اه هي فعلا كلمتني وبصراحه أنا أول مره تعدي عليا حاله
مماثله لبنت حضرتك بس أنا من يوم ماغاده كلمتني وأنا
متحمسة جدا للتعامل معها

ملك بنتي تأثرت جدا بعدم وجود والدتها طبعاً هي طفله
مممكن تلعب وتنشغل بس دائماً وهي نائمة يجعلها كوابيس
ونفسياً مش مرتاحة، حبيت أنها تنزل الحضانه عشان تندمج
مع الأطفال والناس لأن هي كانت ب تتعامل مع والدتها وأنا
بس وبحكم إننا من الصعيد فالأهل كلهم مش متواجدين في
القاهرة وبعد ما عرفت من غاده زملتي بالشغل إن دراستك
كانت متعلقة بتحسين سلوك الأطفال ف بنسبالي الحضانه هنا
كانت الإختيار الأفضل وأتمني إنك تهتمي بملك شويه زياده
عشان تبقى أحسن



أنا مقدره كل ده وأكيد مفيش حد ممكن يعوض وجود الأم
وإحنا هنا هنبذل كل جهدنا إن البنات تعدى المرحلة دي وبعيد عن
الحضانة، ملكك لو احتاجت أي حاجة بره الحضانة أنا تحت امرتك

مع بدأ الشهر الجديد دخلت ملك حياتي بل كانت حياتي
كانت تشبه والدتها كثيراً، ميزها الله بوجهها الملائكي وصفاء
روحها، كان يوسف يتحدث معي كثيراً منذ دخول ملك
الحضانة كنا نعمل معاً على تحسُّن ملك كان يستشيرني بكل
شيء يخصها وكان يتطرق الحديث بيننا بعيداً عن ملك لم
يزعجني الحديث معه كان دائماً يثير فضولي للتعرف عليه أكثر

قام بالإتصال بي في يوم بحُجَّة الإطمئنان عليها وبدأ بسرد
لي قصته مع زوجته كنت أعتقد أنه حزين على فراقها....
وفاجأني بجفاء رده

أصل كانت جوازه صالونات ما الحقتش أحبها

بس إنت عشت معها 3 سنين تقريبا غير فتره الخطوبة!

حصل بس كانت علاقة جواز عادية وروتين لأبعد حد كنت
فاكر الحياه الزوجية بشكل تانى

بشكل تانى أزاى؟

كنت فاهم إن الحب أساس الجواز وإن وجود المشاعر أهم
من وجود أي شيء آخر أنا إفتقدت المشاعر جدا وإحساس



الحب والإهتمام وبعد الجواز إتأكدت إن الحب والثقة
والإحترام أساس أي علاقة ناجحة لوفي حاجة وقعت منهم
أكيد هيبقي في خلل في العلاقة ويا هنتتهي بالطلاق أوحد
بيجي على نفسه عشان الدنيا تمشى

كان في مشاكل بينكم قبل الوفاه؟ أنا بسأل عشان ملك مش
قصدى أدخل

يعنى شوية

بس إنت كنت جنبها وقت مرضها صح؟

أكيد...أنا مش ندل

كان يوسف دائماً يتحدث وكأنه يوجد حمل فوق صدره لم
يشتكى ولكن نبره صوته تفصح عن همه

أعاب نفسي كثيراً لتصديقه كنت أثق بحديثه كأن كل ما
يقوله مصدق ولا يعرف طريق الكذب ابدأ لن أنكر أنني تعلقت
بيوسف منذ اللحظة الأولى ولم أكن أكثرث كثيراً لما يقول
بقدر إهتمامي بأنه يتحدث معي، كنت سعيدة بتحول علاقتنا
لصداقه وتطورت علاقتي به أكثر بعد تعلق ملك بي أو تعلقني
بيها وبدأنا بالخروج سوياً لأجلها في البداية حتى أصبح تلاقينا
خارج الحضانة شيء أساسي لها ولنا

هاتفني لأجل ملك في مساء يوم الجمعة الساعة الحادية
عشر مساءً



ياسمين إزيك؟ أنا اسف بكلمك متأخر

ولا يهملك يا يوسف في حاجه ولا إيه ملك كويسه؟

بتعيط ومش عايزه تنام غير لما تكلمك... حولت أقولها إنك
نايمة عشان مش عايز أزعجك بس إنتِ عارفه قد إيه هي
عنيدة، هي معاكي

يا كوكي بتعيطي ليه يا حبيبي؟

عايزه اشوفك، تعالى وهاتِ شوكلت

حبيبي أجي فين دلوقتي، نامي يا ملك وبكره الصبح نتقابل

فتبدأ ملك بالبكاء كنت هي نقطة ضعفي دائماً، كنت مثل
الأم التاركة لإبتها فلا تقدر علي رفض أي طلب لها لتعوض
عدم وجودها المستمر معها قمت مسرعة لأذهب إليها بيته
دون تفكير في أي شيء

ماما أنا نزله ومش هتأخر

تنزلي فين دلوقتي الساعة 11

معلش يا ماما فريده تعبانة عندها شويه برد هروح بسرعه
بالعربية وأجي على طول

طيب يا بنتي طمينني عليها أول ما توصلي

أعيش أنا وأمي فقط بالمنزل، انفصلت أمي عن أبي منذ
صغري وتحملت هي كل أعبائي بحب، لم تكن فقط أمي كانت



الجميع بنسبه لي بُنيت علاقتي أنا وهي علي الصداقة والثقة
قبل أي شيء دعمتني في جميع خطواتي حتي ما كانت ترفضه
كانت تدعم وتعطى أهميه لكل شيء مهما صغر أو كبر

لم يكن لها غيرى ولم يكن لي سواها

ذهبت لأقرب سوبر ماركت وإشترت جميع الحلوى التي
تحبها ملك وتوجهت لمنزله وأنا في قمه سعادتي كانت أول
فرصه لي لنقترب أكثر

توترت قليلا وأنا أمام المنزل....لماذا أنا هنا!! لما جاءت
ليبت رجل لا يربطني بيه شيء لم أشعر بالخوف بقدر شعوري
بالتوتر وغرابه ما أفعل، لكن بداخلي ما يدفني لهذا! أشعر
بأهميه وجودي بينهم بعد تحسن ملك وأشعر بإحتياج كلاهما
لوجود إمراة بحياتهم، تتحسن ملك منذ تعاملتي معها بالحضانه
وخارجها، أصبحت أكثر إدراكاً للواقع وأقل عنفاً، بدأت تشعر
بالأمان أكثر، لن تقلقها الكوابيس كما كانت من قبل

ويوسف أيضاً لا أعلم إن كان يتحسن أم لا، لا أعلم أيضاً إن
كان حزين أم لا لكن كان يخبرني بأنه بحاجه لي دائماً كيف
يتعامل مع ملك في هذا وذاك، كيف يطبخ هذا وكيف يفعل
هذا، كان وجودهم يشغل فراغ الوقت وفراغ المشاعر كان يكسر
روتين يومي ف يومي لم يكن أكثر من الحضانه ومراعاة أمي
...أمي! وتذكرت أنها المرة الأولى التي اكذب عليها!!



كان علي الإتصال بفريده لأخبرها حتى لا تنكسر ثقة أمي

بي

مسكت هاتفي وبدأت بالبحث عن رقم فريده وقمت

بالإتصال بها

أيوه يا فريده، ماما لو كلمتك أنا عندك دلوقتي

وإنتِ فين إن شاء الله يا هانم

بعدين هقولك.... في نفس اللحظة أجده يفتح باب الشقة

يا سمين أنا أسف إنى خلّيتك تيجي دلوقتي

أسمع صوت فريده في الهاتف

تيجي دلوقتي!! إنتِ فين يا بنتي؟

خلاص يا فريده هكلمك تانى سلام

إزيك يا يوسف؟

إزيك إنتِ؟

تمام أمال فين ملك؟

تفضلي طيب

دخلت المنزل لأجده منزل رجل أرمل، تملأه الفوضى

والعاب الأطفال بكل إتجاه وأكواب النسكافيه الفارغة علي كل



طاولة وطفاياات السجائر مليئة بطفى السجائرأدور بعيني
لأكتشف المنزل كان فوضوي لكنه أنيق كان هادئ إلا من
الآباب ملك وتقع عيني أخيراً عليها لأجدها نائمه علي الأريكة
بالصالة

هي نامت!!

قعدت تعيط وقالت هستتناكي علي الكنبه لحد ما نامت

إنفضلي إرتاحى لحد ما ادخلها السرير

لا أنا لازم انزل حالا

لا طبعاً مش معقول تنزلي من بيتك دلوقتى ومش هتشرى
حاجه حتى، كفاية البنت تعباكى في الحضانه وتعباكى أنهارده
في أجازتك

لم أجادله فأنا أريد الإقتراب منه ويملؤني الفضول بأكتشاف
شخصيته، هزيت رأسى بالموافقة وتوجه هوإلى ملك ليحملها
وبدأت أنا بترتيب الصالة من الألعاب

إنْت بتعملي ايه!

بحأول أرتب المكان شويه

سيبي كل حاجه، أنا بعذر لك علي الكركبة بس الست اللي
بتنصف مَجْتَش الإسبوع ده عشان كده الدنيا مبهدله



لا طبيعي تبقي مبهدله طالما في طفله أنا هَشيل الكوبيات
دي أغسلها وإنت قولي فين المطبخ

ما تتعيش نفسك بس وأنا هعمل لنا فنجانين قهوه نشربهم

علي ما تعمل القهوة أكون أنا خلصتهم

دخلنا المطبخ وبدأت بغسل الكوبيات وبدأ هو بعمل القهوة
وبعد إنتهاء عمل كل منا ذهبت أنا إلى غرفة ملك للإطمئنان
عليها وبدأ يوسف بترتيب البلكون لنجلس بداخلها كانت
واسعه تطل علي كورنيش المعادي تزين بالزهور الطبيعية
كانت أكثر الأماكن حياة بالشقة، فالمنزل بأكمله باهت شاحب
كان الحزن يسكن أرجاءه وكانت البلكون مثل الحديقة المزهرة

بدأ حديثنا وبدأ يوسف يخبرني أكثر عن عمله كان يعمل
في بنك، كان مجتهدا طموحا يسعى دائما إلى الأفضل فتعين
بمنصب ما بالبنك بالرغم من صغر سنه موازنه بالمنصب، ف
كان في الثلاثون من عمره، خمري اللون، يمتلك شعر أسود
داكن ناعم يختلط بيه بعض الشعرات البيضاء لتعطيه جاذبيه
الثلاثون كانت ملامحه جاده وترسم علي شأفته إبتسامه
خفيفة لتُفتن وَجْهه تضيء لمعة عينيه، لم يجذب إهتمامي كثير
الحديث عن عمله، كنت أنتظر حديثاً آخر أنتظر حديث يشبع
فضولي الذي إستقر بداخلي منذ أن رَوَى لي عن زوجته التي لا
أعلم عنها شيء ولا رأيت صورته لها حتى



لم أكن أعلم ملامحها ولا كيف توفت لا أعلم إن كان
يوسف أحبها بصدق أم لا

أکید زوجتك الله یرحمها كان لیها دور فی الوصلت له
أكذب علیکی لو قولت أه

!!! دائما یصدمني جوابه علی فی ما یخص زوجته، تتغیر
ملامحه عند الحدیث عنها یثیر فضولي كثيرا، لا أعلم إن كان
یرید الحدیث عنها أم یجب علی تجاوز ما قال، لا أعلم هل
أشبع رغبتی وأتسأل لما هذا الجفاء؟ أم أنتظر حتی یخبرنی
هو حینما یرید

بیتریوسف کل ما جاء بذهنی فی لحظه وكأنه یدرك فضولي
كأنه یدرك جیدا كل ما أرید معرفته

نفسك تعرفی أنا لیه مش بتكلم عنها صح؟

لوحاب تحکی أكید أنا أحب أسمع

أنا ودالیا إتقابلنا من 4 سنین مقابله بین أي راجل وست
عادیه صالونات زی ما بیقولوا مفیش أي حاجه جاذبتنی لیها
كانت بنسبه لی بنت عادیه زی أي بنت مهممة بنفسها مكسوفه
بتحاول تظهر جمالها عایزه تعجبنى عشان تبقي عروسه بس أنا
ماكنتش شایفها أنا كنت شایف دعاء، دعاء وبس خطیبتی اللی
أعرفها من أيام الجامعة حیبتی وصاحبتی وبتتی وأختی وحاتی



كلها ووجعي والنصيب اللي ربنا ما أرادش أنه يكمل
العلاقة اللي فضلت في حياتي لحد فتره مش بعيده النصيب
مجمعناش مفيش سبب واضح للبعد بنا غير إنه نصيب، قبلت
داليا برغبه والدي بعد ما إتعدبت في فتره البعد عن دعاء، كان
شايف ان الحل الوحيد عشان أنساها إنى أتجوز ومع قلة
خبرتي أتجوزت، أتجوزت واحده معرفش عنها أي حاجه غير
أنها بنت ناس ومتربيه زي ما قالوا مش مهم تحبها المهم
تصونك، أتجوزنا وبدأت الحياه تبقي روتين من بعد يومين
العسل، كام يوم أجازته في حضن واحده المسمى مراتي
والحقيقة أنا معرفهاش، كنت مستغرب فكرة إنى أنام معها كل
يوم وأنا معرفهاش، كنت بسأل هي مبسوطه؟ مستمتعة باللي
بيحصل ده؟ وفضلت الأسئلة دي جوايا ملهاش إجابته زي سؤال
أنا ودعاء سبنا بعض ليه؟ مفيش إجابته! مرت الأيام وعرفت إن
داليا حامل في نفس اليوم ال عرفت فيه إن دعاء إتجوزت....
مفرحتش بحمل داليا وبقيت حاسس إن شبح علاقتي بدعاء
هيفضل كاسر كل حاجه المفروض أفرح بيها، طبعاً إختيار إسم
بنتي ملك كان مبنى علي إختيار دعاء زمان، كل ده عدى لحد
ما في يوم صاحب عمري قال لي هي مراتك مستحملك ليه!
واحده غيرها كانت إشتكت حتى، عيب عليك تضيع الست
اللي بتصونك ومستحملك عشان أيام فاتت وعدت إنسي دعاء
وإبتدي صفحه جديده مع اللي ربنا كتبها لك عشان بنتك حتى



مش عشان نفسك، مش هتفرح لما تلاقي اللي بتعمله في
بنات الناس بيترد في بنتك إنت مهمل في زوجتك بشكل
مبالغ فيه

كلامه بقي بيرن في ودى كل يوم وبدأت أحسن علاقتي
بداليا بس ملاقتش منها إستجابة! مفيش أي إستجابة نهائي!
إفتكرت ده من تقصيري معها طول الفترة اللي فاتت وبقيت
أحاول وفضلت أحاول بكل الطرق لحد ما زهقت سنه كامله
أحاول أعرف شخصية مراتي اللي بنام معها كل يوم! كبرت
ملك سنه وكبر البعد بيني وبين داليا سنين، كانت قايمه بواجبها
كزوجه وأم علي أكمل وجه، زوجه وأم بس يعنى سرير وطبخ
وبيت وملك وبس فقدت الأمل منها وقولت أنا السبب أنا
قصرت معها عشان حب قديم وعدت شهور وتعبت وإكتشفنا
إن عندها فشل كلوي، شلتها في عنيا وشيلت البيت والبت
وجبت واحده تساعدها في شغل البيت، قولتلها إرتاحى وأنا
دوري بدأ زي ما كانت زوجة كويسة جيه دوري أكون أنا كمان
كويس كانت تروح جلسه غسيل الكلى وتيجى تعبانة وتنام
وفضلنا علي الحال ده فتره كبيره لحد ما في يوم قبل وفاتها
بفتره دخلت أصحيتها عشان تنغدى لقتها نامت والموبايل في
أيدها مكتتش عايز أصحيتها عشان عرف قد إيه غسيل الكلى
بيتعبها أخذت الموبايل من أيدها وسمعت صوت رساله علي
الفيس بوك فضولى خلانى أفتح الرساله....



«أنا خايف عليكى ومش عارف إيه في إيدى أعمله أنا
أسف إنى مش جنبك مكنتش هشيلك من حضني»
وقبلها رسالة «أنا حاسة إن يومي قرب خايقة من الموت»
لسه فاكر كل حرف في الرسالة لسه فاكر أكن الرسالة
قدامى

داليا بتخونى!

بقيت واقف قدامها مش عارف أنطق خايف أسألها تقولي
أيوه بخونك، بس بالمنطق عمرها ما كانت هتقول كده عمر ما
واحد متربيه و بنت ناس هتخون جوزها هي أكيد مش بتخونى
أكيد في حاجه غلط أكيد الرسالة دي مش حقيقه

داليا قومي! قومي إصحى حالا

صحيت لاقى الموبايل في أيدي خطفته وبصت لي، إنت
بتفتش ورايا!

إنت بتعملي حاجه غلط تخليني أفتش وراكي!

ماسك موبيلي ليه؟؟

مين محمود؟

.....

مين محمود ده ردى عليا!!!!



ما لاقتش رد محستش بنفسي غير وأنا شايف ملك بتتفرج
عليا وأنا بضرب أمها

بقيت زي المجنون مش عارف أتصرف هي إزاي تخوني!
أنا عملتك ايه عشان تخونيني أنا عمرى ما قصرت معاكي!
عمرك ما قصرت معايا!

إنت معملتش حاجه غير إنك قصرت معايا، ناسي! ناسي
دعاء اللي كنت بتنام معايا وتناديني بإسمها وإنت مش حاسس،
دعاء اللي فضلت تغلط في إسمى وتناديني بيها، دعاء اللي
بتفضل تنادى عليها وإنت نايم وتصحى مفزوع من نومك
عشانها إنت فاكر إنى مش حاسة! ولا فاكر إنى عشان ساكته
أبقى راضيه!! أنا حاولت معاك لحد ما أفقدتني ثقتي بنفسي،
بتحبها مكنتش إتجوزتنى وظلمتنى معاك.... لوحد خان ف
هو إنت مش أنا، أنا كنت بدور علي نفسي مكنتش عايزه أموت
وأنا ناقصني حب

طلعت حاسة بكل حاجه، كانت عارفه وساكته كانت جايه
علي كرامتها وحاولت معايا ولما يئست دورت علي نفسها
كانت حامل مرديتش تطلب الطلاق كملت وقررت تخون
بقيت تكلم واحد من أكونت مزيف علي الفيس بوك عشان
تحس إن في حد بيحبها هي، مش بينسي بيها واحده فتشت
في الأكونت لقيته بأسم غير إسمها وشخصيه غير شخصيتها
أوشخصيتها مش عارف أنا معرفهاش



وجعتها وأتوجعت بس كنت أنا السبب في الوجد كله كنت
أنا السبب في كل حاحه بس معرفتش أسامح معرفتش أشوف
إن إهمالي ليها أو خيانتني ليها زي ما قالت مبرر أنها كمان
تخونى، أنا مكلمتش عليها واحده، محولتش مع دعاء، قصرت
معها اه، مكنتش بحبها وبحب واحده تانية اه بس عمري ما
طلبت مشاعر من واحده غيرها..

ولا طلبت منها يا يوسف! عاملتها أنا اسفه في التعبير بس
عاملتها معامله العبيد واحده بتنام معها لما بتحب وتطبخلك
وتغسلك وتنظفلك وشايله بتتك

بس مختتهاش

الخيانة مش خيانة جسد بس ولا حتى خيانة مشاعر مجرد
إنك قاعد مع واحده بتضحك في وشها ومعتبرك أمانها وإن
في قلبك وعقالك واحده تانية دي خيانة وطبعاً أنا مش بقول ده
عشان أبررأي حاحه حصلت أكيد لو كنت مكانها كان هيبقي
الطلاق أكرم

الغضب كان بيحركنى يا ياسمين أنا زي أي راجل أكيد
عمري ما كنت هعدى الحصل ده حتى لوأنا غلطان أوأنا
السبب، فضل اللي عملته حاجز بيني وبينها أكبر بكثير من
حاجز دعاء، قررت إن الطلاق هوالحل الوحيد وسبت البيت
أسبوع معرفش عنها وعن ملك أي حاحه وفي خلال الأسبوع ده



كان في مؤتمر لازم أحضره تبع الشغل في دبي وسافرت من غير ما أسلم عليها ولا علي البنت إنشغلت جامد في الشغل هناك ورجعت علي مكالمه من والدى بيقولي إن داليا تعبانة وفي المستشفى محدش كان عارف الحصل بيني وبينها، رجعت من السفر وفضلت جنبها مش عارف أسيبها عشان مُستحيل أحكى ومش عارف ماقولهاش تقومي بالسلامة بالرغم من وجعي منها وفضلنا علي الحال ده شهر لحد ما ربنا ريحها من تعبها وكان أرحم عليها منى..

إنت شايل كتير قوي، أسفه إنى فكرتك بوجعك

أنا كل ده كان مكتوم في قلبي مش عارف أحكيه كلام ميتحكيش خُفت إن حد يفتكر إنى بخوض في عرض واحده ماتت، أنا أبسط من إنى أذِي حد أنا غلطت وعمرى ما هنكر بس ماكنتش عايز أوجعها ماكنتش عايز تتدل في حياتها عشان مشاعر أنا قصرت فيها، أنا مش مُؤدِّي يا ياسمين ولا حتى وجعت دعاء لما باعت من غير سبب واضح مشيت عشان قلقت يكون وجودي واجعها، أنا مش وحش، أتوجعت علي موتها قد ما أتوجعت انى ما صلحتش صورتى، أنها ماتت وهى شيفاني كده، ندمت إنى سبت البيت وسبتها وماحولتش أصلح حاجه، إحساسى بالذنب بياكل في قلبي كل يوم بصبر نفسى بخيانتها وأرجع اقول أنا السبب وعایش في الدوامة دي لحد ما قبلتك وشغلتي وقتي وتفكيرى كنت عايز أحكيك من



بدري عشان أشيل الهم اللي زي الحجر ده من علي قلبي بس
أنا عارف إنك هتفميني، أنا حابب تعرفي ... حابب إنك تعرفي
كل حاجه

مش هنكر ان أنا كمان كنت عايزه أعرف، جفاء ردك عليا
لما حكيت لي عنها قبل كده كان بنسبه ليا غريب ومش مفهوم
كنت فاكراه انك نسيها زي الرجاله اللي بتجوز تانى يوم من
وفاة زوجاتهم.... بس فهمت وقدرت حسيت وجعك يا يوسف

إستمر حديثي معه لأكثر من ساعتين إختصر يوسف طريق
كبير بيننا لنقترب بعد أن سرد لي ما حدث تعاطفت كثيرا مع
وزجته يجوز تعاطفت معها بسبب ما عاشته أمي بعد خيانة
والدى لها مع زوجته الحالية أو لأنني أشعر بالغضب اتجاه
والدى لتقصيره معي لأجلها، لا أعلم لماذا، لكن لا أشعر
بالغضب تجاه داليا رحمها الله، لكنني وقعت بيوسف تالألات
عيني وهو يحكى، شعرت بشيء يلامس قلبي أردت أن أحتوي
قلب يوسف بداخلي حتى يلتئم كسره

طال الحديث وحن وقت السكون، تلمع السماء بالنجوم
من فوقنا ويتناسم الهواء مع أوراق الشجر ليعطي نغم هادئ
وتروى القهوة روحنا وكأننا نحكى ما بداخلنا بصمت لم يكن
ينقصني أكثر من ألقى بنفسي بين أحضان يوسف ليكتمل
المشهد وتكتب النهاية ولكنها البداية لكل شيء



يرن هاتفني برسالة علي الواتس آب... فريده.. لأنتبه أن الساعة
واحدة ونصف بعد منتصف الليل وأنا بمنزل يوسف بمفردنا!

الساعة واحدة ونص!!! زمان ماما قلت

لوقلقت كانت إتصلت خليكى شويه! بعدين أنا هوصلك
متقلقيش

لا توصلني فين وملك نايمه لوحدها وكمان أنا معايا العربية
همشي وراكي بالعربية بتاعتى وأرجع علي طول، أكيد مش
هسيك تنزلي لوحك دلوقتي!

قالها يوسف بنبره حاده حتى لا أجادله سعدت كثيرا لما
قاله ووافقته دون مجادله

في اليوم التالي تعمدت أن أذهب إلى الحضانة مبكرا حتي
لا أواجه أمي أخجل من نفسي كثيرا لكذبي عليها ولم أكن
أريد ان أصارحها بشيء الآن أفضل دائما أن يبقى سرى بداخلي
حتى أجد دافعا للإفصاح به

وصلت إلى الحضانة مبكرا لأجد فريده تتصل

أيوه يا زفته

إيه يا فريده في إيه؟

في إيه إنت هتستهبلى! مش كلمتك إمبراح أكثر من

3 مرات!



ما أنا نمت بصبي أنا في الحضانة تعالي نفطر سوا ونتكلم
لم تتأخر فريده كثيرا ف منزلها قريب جدا من الحضانة
ومنزل يوسف أيضا قريب

جئت ويملاها الفضول لأروي لها قصتي مع يوسف
أرمل - عنده بنت اسمها ملك - ساكن في المعادي هنا
-أسمر- مش طويل أوي

وظروف حياته صعبه وأنا جنبه بس
أيوه يعنى كنتي بتهبيي إيه في البيت عنده أمبارح؟
كنت بغسل الكبايات

نعم!

والله بجد

!! طيب افضلي لفي ودوري كده وعنك ما حكيتي بس بكره
لما تيجي وتقولي عايزه أتكلم معاكي مش هرضي
أول ما يبقي في حاجه هتلاقيني بحكيلك غصب عنك وعننى
أوك... طارق كلمني إمبارح وعايز نخرج سوا
بتهزرى! ده أنا قولت مش هيكلمني تاني أنا موفقه يلا
أنهارة هنتغدى مع بعض



هكلمه أقوله بس ياسمين لازم تخدى بالك طارق لسه
بيحبك ومشاعره من نحيك عمرها ما أتغيرت ف خدى بالك
من كلامك معه

حاضر يا فريده إنت عارفه قد إيه هوغالى عندي حتى
لومحبتوهوش، طارق هيفضل صديق الطفولة وعشرة العمر

تقابلت أنا وفريده وطارق عصر هذا اليوم بالكافية الذي
يجمعنا دائما لم تتغير مشاعر طارق تجاهي مثلما قالت فريده،
بيذل طارق أقصى جهده حتى يخفي حبه لي ولكن مشاعره
غلبت قوته،

يُغلب العقل دائما حين تكون المشاعر صادقه مهما حاولت
إخفائها أو الإبتعاد عنها ستظل تلح عليك حتى تنتهي بداخلك
أو تنهيك أنت

وحشتيني يا ياسمين

وإنت كمان يا طارق وحشتني، مش هتبطل تظهر وتختفي
كل شويه

أنا عايز أفضل موجود علي طول بس إنت أكثر واحده
عارفه.... الظروف

سيبك من الظروف بقي وقولنا أخبار الشغل إيه؟ بقيت
تكسب ملايين انت من هندسه الديكور



تتدخل فريده دائما بالوقت المناسب ف هي تعلم ان اختفاء طارق في الأونة الأخيرة كان بسبب رفضي لطلبه بالزواج منى لم اكن احتمل فكره وجودي أنا وطارق بغرفه واحده تحت سقف واحد واقامه علاقه كامله بحب، اشمئز كثيرا من الفكرة، فطارق مثل اخ لي وبعد ما حدث في الماضي لا يمكن أن تربطنا علاقه غير الصداقة

أخبرنا طارق أنه إنفصل في السكان عن بيت أهله وجهاز فيلا جديده في المعادي وسيقيم حفل بها للأصدقاء أكد علينا الحضور وبالتأكيد سنحضر أنا وفريده

انتهى يومنا ورجعت للمنزل وقمت بالاتصال بيوسف تعودت علي وجوده يوميا هو وملك يوسف ازيك؟

ازيك يا ياسمين؟ فينك إنهارده طول اليوم، لما روت اخذ ملك من الحضانه سألت عليكى قالوا لي مشيت بدرى وحولت اكلمك ماردتيش، وحشتينا

معلش مشيت بدرى فعلا عشان اقابل فريده وطارق أصحابي كنا بنتغدا سوا ومسمعتش الموبايل لما كلمتني

مين طارق؟ بتحكلي عن فريده دايم بس ما حكتليش ان ليكي صاحب اسمه طارق



أنا وطارق وفريده اصحاب من ايام المدرسه دايمًا مع
بعض بس طارق ماجتيش سيره عنه لان هودايمًا بيخفتي
ويظهر وفريده هي الموجودة طول الوقت ف حكاياتي كلها
معها

وحكايتك ايه مع طارق؟؟

قال يوسف ما قال بأسلوب حاد دون تفكير كأنه يلومني
علي وجود طارق بحياتي

حكاية ايه يا يوسف! أنا وطارق اصحاب عادي! مالك؟

مفيش أنا اسف علي طريقتي أنا بس مش نايم كويس وكان
عندي ضغط شغل إنهارده المهم إنت كويسه؟
الحمد لله...

تمام هنام أنا بقي وأشوفك بكره إن شاء الله

ظهرت غيرته الزائفة اليوم... ظهرت غيرته التي أوقعتني به
ولم أقدر على القيام مجددًا وقعت بوجعي ليس بحبه

أغلقت الهاتف وذهبت لأجلس مع أمي قليلاً قبل نومي
جلسنا لتحدث ونصف عقلي معها والنصف الآخر مع يوسف
لأول مره يجذبني أحد لهذه الدرجة اهتم لما يقول ويفعل وبدأ
عقلي بطرح الإستفهامات



هو يوسف نزل وصلني عشان خايف عليا ولا ده ذوق منه؟*
هو غيران عليا من طارق ولا غيران إن في حاجه شغلاني
عنهم

ما يمكن تعبان فعلا زي ما قال*
تدور الأسئلة حول رأسى وينتهى بي المطاف لتجدني أمي
نائمه بحضنها من كثره التفكير

ذهبت كعادتى في صباح اليوم التالي إلى الحضانة لكن
اليوم أنتظر يوسف ليأتي بملك بفارغ الصبر أردت كثيرا أن
أفسر له علاقتي بطارق خوفا من أن يفسر هو العلاقة بشكل آخر
فأخسر ما لا أملكه

تأخر هذا اليوم وبدأ الشك يتتابني بتعمده التأخير ليثير
إستفزازي، دقت الساعة الثانية عشر، قمت بالإتصال به رن
الهاتف كثيرا ولم يرد وقبل أن أغلق ..

الو

الويا يوسف ازيك؟

الحمد لله ازيك؟

أنا صحيتك؟ صوتك نايم

لا أبدا أنا تعبان شويه عشان كده ماجبتش ملك الحضانة



تعبان مالك؟ سلامتک

برد و حراره ف نايم طول اليوم

طيب أنا جايه

ماتتعيش نفسك

لا أنا جايه عشان ملك لازم حد يراعيها أكيد إنت مش
هتقدر

أغلقت الهاتف معه وتوجهت إلي منزله لأطمأن عليه،
تعلقت بيوسف وأنا لا أدري كيف ومتى ولماذا؟! لم يكن
هدفي مرعاه ملك فقط ولم يكن أيضا الإطمئنان عليه فقط،
أريد البقاء بجانبه، رؤيته، أرغب بأبديه الوجود معه لا أرى غيره
ولا تلمح عينيه أحد سواي، تعلقت بيوسف كثيرا..... مع كامل
أسفى لنفسي

شكلك تعبان قوي يا يوسف

وإنت شكلك قلقان قوي

بطل رخامه، هشوف ملك وهشوف في إيه في المطبخ

يتاكل

أتركه ليستريح وأخذ ملك معي إلي المطبخ وأبدأ بالتفتيش
عن أي شيء لإعداده لهم بدأت بإعداد الطعام وترتيب المنزل



وكانت ملك تنظر إلى فقط، تتابعني بعينها الصغيرتان بوعي
شديد لفت إنتباهي وإعتقدت أنها بدأت تمل لأبداً بالغناء لها
وتغنى معي مثلما نفعل بالحضانة

Twinkle Twinkle

Little star

How I wonder what you are

Up above the world so high

Like a diamond in the sky

You are a diamond

أنظر خلفي لأجد يوسف ينظر لي ويقول هذا

إيه!

You are my diamond ملك

أضحك علي ما فعل وعلي خجلي منه ... الأكل جاهز
هحضر السفرة عشان تتغدوا وأمشي أنا

هتتغدى معانا أكيد

لأنا سايبه الحضانة إمبراح وإنهارده لازم أرجع لوساعه

حتى

تنظر ملك لي وبإستعطاف...



إتعدى معنا عشان خاطري

يا حبيتي أنا اعمل أي حاجه عشان خاطرِك إنتِ

جمعتنا مائده واحده، مائده عليها طعام من إعدادي لهم!
بيته مع إبتته وتملأني السعادة وأنا لا أعلم نهاية طريقي

دادى ممكن ياسمين تفضل معنا هنا علي طول

أزاي يا ملك، ياسمين لازم تروح بيتها

نانا قالت ان مامي مش هتيجى تانى ممكن ياسمين تبقي

Please daddy مامي

صدمتنا ملك بما قالت وإختلاطت عواطفني بين الحزن
لإحتياجها والفرح لتعلقها بي، بين ذهولي من الحديث
وخجلى من يوسف .. نظرت إلى يوسف لأجده ينظر لي بعينه
الواسعتان نظره يملأها فضول وشغف في سماع قبول طلب
ملك

لم أجب ولم افعل أي شيء، لم ينطق يوسف بكلمه واحده
صريحة تأكد أنه يريد مثلما ملك تريد

ف فضلت الإنسحاب...

أنا شبعت ... أنا شاطره وخلصت الأكل بتاعى كله يا ملك
يلا إنتِ كمان خلصي أكلك كله عشان تتفرجي علي كارتون



دارى يوسف وجه عنى حتى لا يشعر بالحرج كان ينتظر رداً..
حسناً لأجعله ينتظر كما جعلني أنتظر لم تكن إشارته البعيدة
كافية بالنسبة لي لقول أحبك أريد أن أصغي إليه وهو يقولها
بكل وضوح

وحشيتني يا ياسمين مفتقده وجودك في البيت

أنا مقصره معاكي يا أمي أنا اسفه غضب عنى شغل
الحضانه كثير عليا الفترة دي وبقيت أسهر أخلص شغل لحد
وقت متأخر أنا كمان مفتقداكى ومفتقده حضنك هخلص شغل
بدرى ونخرج

لم يكن تقصيري تجاه أمي بدافع الحضانه لكن دخول
يوسف وملك حياتي أخذ الكثير من حقها أنا أيضاً مشتاقه لها
بالرغم من أن البيت يجمعنا كل ليله لكن لم أحتضنها منذ
وقت لم أتحدث معها كثيراً لم أستمع منها لما حدث
بالمسلسل التركي الذي تابعه لأكثر من شهرين أوتتقد
إنخفاض وزنى بسبب قله التغذية وإنشغالي الدائم بالعمل
أشتاق لدعوات أمي بالرغم من أن دعوتها دائماً مقصره علي
الزواج «يارب يرزقك بالزوج الصالح» «يارب أشوفك أحلى
عروسه قبل ما أموت» «ربنا يهدى قلبك علي طارق» تفضل
أمي طارق دائماً مثل أي أم لا تريد أكثر من زوج لإبتتها يصونها



ويتقى الله فيها لا تنظر لحب أو علاقة جنسية لا تنظر لراحة قلب تهتم فقط بالقبول مثلما تقول دائماً «طالما في قبول الحب هيجي لوحده بعد الجواز بالعشرة هتحييه» لم تكن تعلم أمي سبب رفضي لطارق لم يكن أحد يعلمه غيره حتى نحن لم نصارح بعضنا بهذا إلا بعد أن عرض الزواج علي كان يكتفى كل منا تخبأه ألمه من الحادث ولم نتكلم فيه نسي هومع الأيام وكبر جرحي أنا بالأيام

كان يجمعني أنا وطارق وفريده دروس الإعدادية بيته ولم تكن فقط الدروس التي تجمعنا كان يجمعنا كل شيء الدروس والنادي والمذكرة وصدقة الأهل كل شيء حتى جاء اليوم الذي بعد بيننا وخذت به صدقتنا

كان ليله إمتحان التاريخ طلب طارق حصة إضافية في هذه الليلة لمراجعة المنهج قبل الإمتحان لضعفه في هذه المادة تكاسلت فريده على حضورها وحضرت أنا إلى منزل طارق قبل بدأ الدرس بنصف ساعة لمراجعة المادة سوياً

مالك يا طارق شكلك مش مركز خالص؟

مفيش

مفيش إيه بس! إنت شارب؟

مش كتير



إنت هتضيع نفسك بالشرب يا طارق أنا مش فاهمة بتعمل
كدة لية، الناس اللي إتلميت عليهم دول هيضيعوك، أهلك
لو عرفوا اللي بيحصل ده الدنيا هتتقلب بجد
خلاص يا فريدة ملهوش لازمه الكلام ده

دخلت والدة طارق تخبرنا أن أستاذ شريف حضر بدأنا الحصّة

وترأسنا شريف أستاذ التاريخ وبقي طارق بين الوعي
واللاوعي وبعد ربع ساعه جاءت والدة طارق وألقت السلام
وإستأذنت بالذهب إلى مشوار طارئ وبقي المنزل فارغ من
أهل طارق وبقيت أنا وهو وأستاذ شريف وإستمر الدرس كما
نفعل دائماً وبدون أى مقدمات طلب شريف من طارق عمل
فنجان قهوه له لم يكون طارق يعلم كيف يقوم بعمله وشرح له
وقام طارق إلى المطبخ الذى يمكن في آخر الشقة بعيداً عن
غرفة السفارة التي نجلس بها وعندما تأكد بأن طارق بعيداً طلب
منى شريف غلق باب الغرفة حتى لا يتسرب هواء التكييف إلى
الخارج قمت لأغلقه وفي ثواني قليلة شعرت بشريف يلصق
جسده بجسدي شعرت بعضوه الذكرى يعافر بشدة كالثعبان
محاولاً إختراق ثيابه ليتوغل جسدي ويبخ سمه علي تصلب
جسدي وأنا لا أعلم ماذا أفعل لا أعلم كيف على إبعاده لا أعلم
ماذا يحدث شل تفكيري وهو يحك جسده بجسدي ويكبس
صدرى بيده يهمس في أذني بألفاظ بذيئة ويتوعد بالأذى إذا



علم احد بالذي يحدث ظل يمسح جسده بجسدي حتى بُل
بنظله وهدأ في نفس اللحظة فتح طارق الباب ليجد شريف
الذى لا يمت إلى إسمه بأي صلة يحاصرني بين جسده
والحائط وجسدي متصلب ودموعي تنهمر بشدة إبتعد شريف
ووضع طارق الصينية على الطاولة دون البوح بأي كلمة وكأن
الكلمات تعلقت بحلقه من هول الموقف إتسعت حدقة عينيه
وإرتعشت يده فوضع القهوة مسكوب وجهها ورجع شريف إلى
مقعدة كأنه لم يفعل شيء ظللت واقفة مكاني لا أقدر على
الحركة ولا أدري ما الموقف الآن هل حدث ما حدث وأجلس
لتكمله الدرس الذى يدرسه لي معلمي وأستاذي ومثلي الأعلى
أم أمسك القلم وأغرزه بعضو الرجل الذى أنهك جسدي بكل
خساسة وتدنى وقلة شرف وقف طارق أمامي لا يدرى ماذا
يفعل ساكت ليس بيده حيلة أو بيده وهوليس بوعيه تمرکز
أمامي يشاهدني وكأنه قطع تذكرة في متحف لمشاهده تمثال
المراهقة التي تم إنتهاك عرضها

يلا يا طارق عشان نكمل الدرس عندي حصة بعدك

جلس طارق أمام المعلم المغتصب وكأنني لست بالغرفة

معهم وكان شريف يخبرني ما على فعله

تحركت في إتجاه الخروج وجلست على السلم أمام منزل

طارق أبكى وعقلي يصرخ باسم أبي لما أنت لست هنا ليت



الأيام تعود وتبقي يا أبي لم يكون يجرأ عديم الشرف بفعل شيء ما دمت أنت بجانبني لم يكون اللوم عليه أنت الملام الأكبر أنت الذى سمحت بتركك لي بكل هذا أنت من سمحت للجهلة بثررة علينا لمجرد توجدنا أنا وأمي بمفردنا في البيت، أنت من جعلت قلب أمي مهشماً وسمحت للحقير بلمسي الكل يعلم كم التظاهر بالقوة الذى نتظاهر به ونحن قلبنا مؤوى للخوف لتوجدنا بمجتمع كمجتمعنا الذى ينهش بعرض إنائه لعدم وجود رجل معهم لم يعلموا أن الرجولة ليست بالتواجد فقط شريف متزوج ومتواجد مع زوجته وأولاده ولا يمت للرجولة بشيء وطارق أيضاً سيكبر ويعلم أنه لا يمت للرجولة بشيء يتحرش المتحرش بالأثنى في الشارع ولا يمت للرجولة بشيء ويأتي ذكر آخر يبرر موقف المتحرش بملابس المتحرش بها ولا يمت للرجولة بشيء ويأتي آخر يلوم المتحرش ولكن الله عفواً كريم ويطلب للمتحرش السماح من الضحية لو كانت إبتك أوأختك ما كنت تركته إلا بعد تهشيم رأسه إلى قطع صغيرة بصغر عقلك الذى يدافع عن متحرش

تمالكت نفسي وذهبت إلى البيت وإغتسلت وأويت إلى فراشي لم أتكلم مع أمي بشيء سوا أني وقفت أمامها وبدون أي مقدمات

أنا بكره بابا قوى ياريتوا مات ولا إنه يسبنا



في اليوم التالي لم تتلاقي عيني أنا وطارق خرجنا من الإمتحان وذهب كل منا في إتجاه تسألت فريده كثيراً ماذا بيننا نحن الإثنين ولم نخبرها بشيء ظل إنتهاك جسدي سراً بيني وبين طارق بقيت أنا أصارع نفسي في تخطي ما حدث كان يؤلمني كثيراً ويؤلمني أكثر أنني لم أأخذ حقي لم أقم بفعل يرد لي حقي لم أقم بأي شيء لا تجاه شريف ولا تجاه طارق ومع الأيام ووجود فريده وأمي ووالدة طارق ومحاولتهم الصلح بيننا بعد أن أخبرهم طارق أنه قسي على في الهزار قليلاً فغضبت منه ولمعرفته أنني لم ولن أتكلم مع أحد بقيت علاقتنا صداقة مخبأ وراءها حادث لا يعرفه غيرنا

فليس لدى سبب مقنع بنسبة لأمي لرفض طارق ف هو يعمل بهندسة الديكور لديه فيلا يمرح بيها الخيال

ذو أصل كريم، شهم، يُعتمد عليه (بنسبة لها) في كل مرة تتحدث معي عن طارق أخبرها أنني لا أشعر به كأن قلوبنا لا تلتقى أخبرها بأنني ليست مطالبتي كثيره للزواج فأنا فقط أريد أن اشعر بالحب والأمن لأتزوج

الحب كالموت بالرغم من إختلاف الشعور بينهما فهما يتشابهان كثيرا في الحدوث، كلاهما يأتيان بلا سبب لا يطرقان باب قلبك يدخلان دون إذن فالحب يزيد دقاته والموت يبطلها الحب يحييك والموت يدفنك، إنتقى من يحييك ليس من يدفنك من إفراط دقات قلبك



5 دقائق وستكون الساعة الثالثة عصراً خمس دقائق وسيأتي يوسف لأخذ ملك، إنشغلت كثيراً ولم أتبته للوقت لم أجد وقت كافي لأذهب أمام المرآه لأستخدم أدوات التجميل وأحمر الشفاه مثلما أفعل قبل مجيئه كل مرة دقت الثالثة ودق باب مكتبي

تأتي ملك إلى مكتبي كل يوم مرتين في الصباح عندما تصل وفي هذا الوقت لتعطيني حضن يسع الدنيا وما فيها كنت أجد بحضنها شيء ما كأن أنا من أجد الحنان بداخلها

أحلى حضن في الدنيا يا ملك هتوحشيني

ازيك يا ياسمين

ازيك يا يوسف طمني عليك وعلي الشغل

كله تمام الحمد لله، شكلك مشغول

اه فعلا بحاول أخلص بسرعه علي قد ما أقدر عشان هخروج أنا وماما إنهارده

أوك مش هعطلك بس بكره أجازتك إعملى حسابك اليوم كله هنقضيه سوا

فين؟

بكره هتعرفني، يلا يا ملك قولى باي لياسمين



في طريقي إلى المنزل ويشغل بالي ماذا سأرتدي غدا، ماذا
سأفعل إذا قال يوسف ما أنتظره، وماذا سأشعر إذا لم يقول!

وصلت أمام المنزل وقمت بالاتصال بأمي لأعلمها أنني
أنتظرها أمام المنزل

ذهبنا سوياً إلى مطعمها المفضل وبدأت تسألني عن العمل
وتطمئن أن تسير الأمور بالحضانة كما أتمنى، ثم تسأل علي
فريدة وطارق ثم تسأل عن ما خشيت أن تسأل عنه

إيه بقي شاغلك في الحضانة أوي كده الفترة دي؟

في بنت جات ليا الحضانة يا ماما، طفله صغيرة أمها
إتوفت والبنت علي إستيعاب كامل ان أمها مش هترجع تاني ف
كان عندها إكتئاب ووالدها طبعاً عمره ما هيعرف يقوم بدور
الأم كمان صعب عليه، ف سمع عن الحضانة من غاده جارتنا
وجيه قدم لها ف أهتمت بالبنت وبظرفها علي قد ما قدرت

المفروض اللي في ظروف والدها يسأل علي عروسه مش
علي حضانة!

معرفش يا ماما بقي أنا مالي يسأل علي عروسه ولا علي
حضانة بس أكيد عشان شغل البنك برضه مش هيعرف يسبب
البنت في البيت

هو يشتغل في بنك؟



أقع بالكلام دون تفكير لم أعتاد ان أخبأ شيء عليها

اه يا حبيبتى في بنك

أنقذنى الويتر بالمطعم عندما جاء بالحساب قبل أن
تستدرجني أُمي بالحديث عن يوسف

ألثفت أُمي لتحمل حقيبتها من علي ظهر المقعد الذى
تجلس عليه

لاحظت وجود كدمه علي معصم يديها

إيه يا ماما ال في إيدك ده؟

مش عارفه يا ياسمين والله أنا صحيت من النوم لاقتها كد
يمكن أتخبطت وأنا مش حاسة

معقول خبطه جامده كد ما حستيش بيها! شكلها مش طبعي
هبقى أكلم الدكتور أحجز معاد معه نشوف إيه ده

مش مستهله يا حبيبتى أنا كويسه

وهتفضلى كويسه يا روح حبيبتك إنتِ إن شاء الله ربنا
يديمك نعمه في حياتي

نهضنا وتوجهنا إلى المنزل وأنا بالطريق تلقيت رساله من
يوسف

هدى عليكى بكره الساعة 3 إستمتعى بوقتك



لم أنام هذه الليلة لم يخمد عقلي من التفكير كان الأرق
شريك مضطجعي

تقلبت كثيراً طوال الليل بلا جدوى إنه أول موعد حقيقي
بيننا، أول موعد وأنا اشعر بشيء جاد تجاه يوسف أول موعد
وأنا أنتظر منه شيء

في التاسعة صباحاً استسلمت لا منفعة من تمددي هذا،
سأصل بفريدة لتأتي، أريد أن تكون معي قبل أن يأتي يوسف،
قمت بالاتصال بيها كثيراً لم تجب ذهبت لأستحم وخرجت
قمت بالاتصال مجدداً

-اخيراً رديتي أنا اتصلت بيكي فوق العشر مرات

-ما محدش بيتصل بحد يوم الإجازة بدرى كده!

-طيب قومي ألبسى وتعالى

-يا بنتي نايمه أقوم إيه أجرى نامي إنتِ كمان

-ما أنا مش عارفه أنام

-ليه

-خارجة مع يوسف كمان كام ساعه ومنتوترة قوى

-إقفلى يا ياسمين إقفلى خلىنى اقوم ألبس وحضرىلى

القهوة بتاعتى علي ما أجي



أغلقت الهاتف معها وجاءت فريده الساعة الثانية عشر ظهراً
قامت بما تقوم بيه حينما تأتي كل مرة ألفت التحية علي
أمي وأخذت من أمي نصيبتها من الدعاء وقامت بالدخول إلى
المطبخ لعمل القهوة وأتت إلي بغرفتي

هتتكلم جد ولا هتستعبطي زي المرة الفات وأقوم أمشي
أنا متوترة أوي يا فريده حاسة أكن أول مره أشوفه

اشمعني؟

عشان حاسة أن وجوده مهم في حياتي حاسة أنى عايزه
حاجه تحصل تخليه موجود علي طول أنا مبسوطة بوجودي
معه، فرحانه، عارفه لما تبقي مع حد وتحسي ان ليكي أهمية،
ليكي أثر هنا، حاسة أن وجودك ضروري وفارق

أنا بحس بكل ده وأنا معه هو وملك بفرح ومش بفكر في
أى حاجه غير إنى فرحانه.

حبيتي يختي

ضحكت كثيراً علي رد فريده أعلم أنها تريد الحديث أكثر
عن هذا الوضع تريد أن تستفسر عن كل شيء بالتفصيل الممل
لكن هي تعلم أنه ليس الوقت المناسب لهذا.

هتلبسي ايه



أمال أنا مصحياكى بدرى وجيباكي ليه

خلينا نرتب شعرك الأول وبعدين نشوف هتلبسي إيه

بدأت فريده بتجهيزي لم يأخذ شعري وقتاً معها فبطبيعته
أملس لكن تحب فريده أن تعطي كل شيء حقه لا أتحدث عن
الحق بشعري أتحدث عن المناسبة عن أول موعد لي كانت
تتمنى فريده دائماً أن أرتبط، بالرغم من أنها تتعاطف كثيراً مع
طارق ألا أنها تعلم إننا لا نتناسب، تعلم أن طارق لم يكن قادراً
أبداً علي إخراج ضعفي أمامه لم يكن قادراً علي ظهور ما لم
أظهره أمام فريده وامي، تعلم فريده ان بداخلي الكثير تعلم
أنني لم أكن بالبساطة التي تظهر علي دائماً، تعلم أن ضعفي
لن يتعري أمام أحد سأظل أظهار بالصلافة حتي أجد الأمان
حتى أضعف بلا خوف، طارق ليس أماني، ليس من يستوجب
علي التعري من قوتي أمامه، تعلم فريده كل هذا

تفكري المفروض ألبس فستان ولا بنطلون

أنتم هتخرجوا فين

مش عارفه

يعنى إيه مش عارفه

مش عارفه يا فريده والله بس أكيد مش هنروح دريم بارك

يعنى



صبرني يارب...

تفتح فريده خزانة ملابسي وتبدأ بالبحث عن إختيار مناسب

ممکن الأحمر ده؟

لا طبعا مش هلبس احمر اول مقابلة

جربى طيب البنطلون والبلوزة دي وخدى الفستائين دول

كمان

لم يعجبني شيء لم أقتنع بأي منهم

ياسمين فين your tight black cap sleeve dress with U neck

متعلق عندك

طيب خدى ألبسي

لا مش هلبسه أكيد ده قصير ومفتوح من عن الصدر قوى

قصير إيه يا ياسمين ده Knee length

جربى بس وبعدين نشوف

ها ..

تحفه ألبسي عليه White sneakers

فكي شعرك يا ياسمين أنا مش قاعده نص ساعه أعملهولك

عشان تربطيه



هحط ميك أب خفيف قوي مع اللي أنا لابساه ده Rouge and

nude blusher

وحطي ايلالينر

لا كفاية أوى كده

استعديت وبقي علي المعاد نصف ساعه

أقف أمام المرآه أنظر لنفسي وأرى فريده خلفي تنظر لي بحماس

إرتديت فستان أسود ضيق يبرز رشاقة جسدي يرسم إنحناء
خصري المتناسق ف يتباين لون جسدي أكثر يجعلني أزهر
بداخله ويتدلى شعري علي ظهري لأخره ينعكس لونه البنى
مع عيني ليكشف عن لونها اللوزي ويخفي وشم عنقي
المنقوش بعبارته be strong ثم إرتديت حلق ذهبي صغير مخبأ
بين موجات شعري الضعيفة

أنا هفضل قاعده هنا مع طنط مستنياكى وماتنسيش بكره
ليل الحفلة بتاعه طارق

ماشى خدى بالك من ماما وفكرى هنبس ايه بكره في الحفلة
يقطع الهاتف حديثنا كان بجانب فريده تنظر إلى الشاشة
لتجد اسم يوسف

ابو ملك بيتصل يا أم العيال

أطلقت فريده لقب «أم العيال» منذ إفتتاح الحضانه



كانت تسخر من فكره الحضانة كانت تعتقد أنها فقط صداع
من زن الأطفال لا تعلم إنني أجد نفسي بمراعاتهم، أو من بأن
فاقد الشيء أفضل شخص يعطيه وأنا فقدت مراعه أبى لي
فكانت فكرة الحضانة شيء معنوي لي ليس مشروع للربح

ودعت أُمي وفريده وذهبت ليوستف وقلبي يدق اسرع من
دقات خطواتي بالأرض أخرج من العمارة لأجده واقف أمام
سيارته يلقي التحية ويتمعنني بعينه كثيراً لم أشعر إنني أعجبه
بالرغم من أن نظرتة لا توحى بهذا أمسك بيدي ليصليني إلى
باب مقعدي ويغلق باب السيارة ويأتي من الاتجاه الآخر ليقود
رحلتي الأولى معه أجد ملك بداخل السيارة تنظر لي بحب

ملك You look so cute جميل قوى اللي إنتِ لابساه

أنا اللي مختاره

جميل يا يوسف

هو إيه ال جميل

اللي ملك لابساه

بس مش ملك بس اللي شكلها جميل

مين تانى؟

أنا... أنا شكلي حلوي يا سمين ومهتم بنفسي ولا بس اسود



يعتقد يوسف أنني حمقاء لا أستعب تغزله الغير مباشر
لكننى اتظاهر بهذا فقط

طيب مش هتقولى رايعين فين بقي؟

رايعين السخنة

نعمل ايه في السخنة؟

والله أنا كنت ناوى أحجز عرفتين في أوتيل ونقضى اليوم
من الصبح هناك بس عارف إنك مش هتوفقى ف هنتغدى في
Movenpick ونرجع

يعنى هنروح المشوار ده كله عشان نتغدى مش هتتعب من
الطريق؟

مش مهم التعب المهم إنك معايا..... بعدين دي السخنة
ساعة من هنا مش وقت يعنى أنا لورايع المهندسين في
الزحمة هوصل في 3 ساعات

دار حديث طويل بيني وبين يوسف حكيت له عن أبى الذى
لا أعلم شيئا عنه منذ صغرى لا أعلم أين يسكن ولا ماذا يفعل
لا أعلم أذا لدى إخوه منه ومن زوجته الأخرى ولا أعلم إن كان
يريد رؤيتي أم لا لكن بتأكيد لا يريد إن كان يريد لفعل لكنه لم
يترك أثر للوصول له لم يترك خيط لأتبعه هوفقط ترك نقطه
سوداء بقلبي أنا وأمي وهجر حاولت أمي كثيرا أن تصل إليه



حتى لا أشعر بأن ظهري يتهشم مع الزمن لكنه إختفى كأنه
يتعمد ألا يظهر لي

كنت أريد فقط أنا أسمع عُذر واحد يجعلني أشفع وأنا
أعلم جيدا أنه مهما كثرت الأعذار سيبقى قبح ما فعل بقلبي

لكن الله رزقني بسند صلب صارت لي أمي هي الأب والأم
والأخت والصديقة والعائلة بأكملها هي المعنى الحرفي
للإحتواء بالنسبة لي كبرتني، ساندتني وجعلتني أقوى على أي
شيء هي عوني بالحياة كنت دائما تنصحنني بأن أكون قويه
وحنونه حتى أصبحت كذلك

حكى لي يوسف عن طفولته ونشأته بالصعيد وإنتقاله إلي
القاهرة منذ إلتحاقه بالجامعة وعاش هنا منذ دراسته لم يرجع
للصعيد بقى لأكثر من عشر سنوات لم يكن الإعتياد علي حياة
العاصمة سهل عليه لكنه إعتاد وتأقلم

حكى لي عن والدته التي تلح عليه ليتزوج لتطمئن عليه
وعلى ملك وعن إصرار والده للزواج من بنت عمه وخلافتهم
الدائمة بسبب هذه الزيجة

التي يرفضها بسبب إنطوائية بنت عمه المبالغ بها

وصلنا إلى السخنة وإستمر حديث التقارب وبدأت أنا
بإطعام ملك بعد طلبها خوفا منها بأن تسقط الطعام علي
ملابسها الجديدة



يوسف هوانت برج ايه؟

العقرب 10-29 وإنت؟

القوس 12-14

وملك برج الجوزاء

اه ما أنا عارفه هنعملها عيد ميلادها الاسبوع الجاي في
الحضانة أعمل حسابك تاخذ أجازته من الشغل عشان تحضر
الحفلة

لا إعملى إنت حسابك اليوم ده بليل تبقي موجوده معنا في
البيت نحتفل بيها

كان عندي فضول اسألك علي حاجه

اكيد اسألى

كنت شوفت عندك في البيت لما كنت تعبان جيتار ده
بتاعك؟

اه أنا كنت بعزف

طيب ليه مش مستمر

بعد وفاة داليا ما بعرفش أسيب ملك لوحدها في البيت
وأنزل أتمرن ف أتركن زي حاجات كتير



زي إن مابقاش في أصحاب بقت مقتصره علي الناس اللي
في الشغل وقت الشغل ويس، زي البعد عن الأهل بسبب
المسافات والإختلاف دايمًا عشان الجواز، زي نفسي اللي حتي
مفيش وقت أقعد معها دايمًا مشغول بملك والبيت والشغل،
صعب عليا قوي يا ياسمين، يمكن أنا ماكنتش بقدر قد إيه
الست بتتعب وأن شغل البيت عادى وملهاش غير بيتها وجوزها
وعيالها لحد ما عشت الحياة دى وعرفت قد إيه أنتم بتتعبوا
وقد إيه صعب تكون الست بتشتغل وناجحة وواخده بالها من
بيتها وجوزها وتحمل وتخلف وتربي أطفال وتطبخ وتنظف
وفوق كل ده تبقي مهمته بنفسها عشان جوزها

تستاهلوا الجنة والله علي اللي بتعملوه ده

طيب وإنّ مشكلتك إيه في الجواز يا يوسف إيه ال
مخليك مستني؟

مستني أحب ... مستني أحب وأثق عشان ما أظلمش واحده
معايا زي ما ظلّمت داليا

بس إنت نسيت دعاء خلاص؟

أكيد، دعاء أتنسيت من وقت ما حولت أتقرب من داليا
بس القدر دايمًا بيععد عنى أي حاجه بحول أوصلها أكيد ربنا
كتبلي الخير بس نفسي أستقر نفسي حياتي تبقي هاديّه مش
كلها مشاكل ووجع... عايز أرتاح بس



فاكره لما كنت بقولك انى كنت فاكر الجواز أساسه الحب

هيفضل الحب له 100 معني وتفسير كل واحد بيفسره علي حسب إحتياجه أنا إحتياجي راحه وثقة فا شايف عشان أحب لازم أبقي مرتاح مع اللي بحبها وواثق فيها غيري محتاج إحتواء واللي محتاج حنان وغيره من مليون شعور الواحد محتاجه ولما يلاقيه هيعرف أنه حب

وأنا الحب بنسبالي أساسه الراحة يا ياسمين لازم ألاقى راحتي عشان أحب وأتجوز بس الحمد لله أنا حاسس أن ربنا هيعوضى قريب إن شاء الله

ربنا يرزقك باللي تريح قلبك

وإنت بقي مش عايزه تحكيلى عن حد؟

ما هو مفيش حد اصلا

لا أنا بتكلم قبل كده

والله يا يوسف ولا قبل كده ولا دلوقتي

أنا ناس كتير حولت تدخل حياتي بس كنت دايمًا رافضه

زي ما إنت بتدور علي الراحة أنا بدور علي الأمان

أنا الحب بنسبه ليا يعنى الأمان عايزه أطمئن عشان أحب

وأتجوز



عايزه ألاقى حد أعرف أضعف قدامه من غير ما يعتبر
ضعفي ذل

من غير ما يمسكني من نقطه ضعفي بعد كده أنا عمري ما
كنت ضعيفة يا يوسف عمري ما ضعفت في أي موقف
وصعب عليا إنى أفضل قويه طول الوقت، أنا كنت بضعف
قدام نفسي بس، أنا عايزه حد يبقى هونفسي اللي أضعف
قدامها عايزه حد أبقى في حضنه ضعيفة ومش خايفة وأخرج
من حضنه أقوى من الأول وقادره أواجه الدنيا عايزه حد
يقويني عشان أنا مفيش جوايا طاقه تخليني أقوى نفسي
خلاص

وبقي الحوار بيننا طويلا عن ماذا أحب وماذا يحب تشاركنا
عناوين الأفلام والمسلسلات، المطاعم والبلاد يجمعنا زوق
واحد بكل شيء ما عدا شيئا واحد

«الطعام» يحب يوسف كل شيء لا أحبه جعلني ألاحظ أن تقريبا
لا أكل سواي الخضار والرز، أنا نباتيه لا أشتهى اللحوم مطلقا
وهو لا يأكل غيرها

يفضل المكرونة وأفضل الرز، يفضل السوشي وأنا لا أكل
مأكولات بحريه

بس أنا بحب الايس كريم



طيب الحمد لله في حاجه مشتركه بنحبها
خلاص طالما مشتركه العزومه الجايه عليا، ناكل ايس كريم
على كورنيش المعادى

امتى؟

وقت ما تحب

يلا دلوقتي؟

هنلحق قبل ما يقفل؟!!

أكيد

كانت الساعة التاسعة مساء افتح لي باب السيارة وأخذت
ملك بحضني لتنام وأخذ يوسف الطريق وأوصل هاتفه بوصلة

AUX

كان الطريق هادئ والسماء صافيه وصوت عمرو دياب يبهج
قلوبنا ليقرب بيني وبين يوسف

«صدقني خلاص من بين الناس

حيبتك وإخترتك ليه

طول ما أنا وياك قدامى ملاك

خلتني ما غمضش عنيا»



غفوت بعد أن أطمئن قلبي وهمد عقلي من التفكير والقلق
غفوت وكأنني لم أنم منذ زمن، غفوت وأنا أحتضن ملك
وأحتويها وكأنى أحتوى الكون بما فيه لا أعرف كيف غفوت
بهذا العمق وأنا مع يوسف شعرت بالسيارة تقف، إستيقظت
وأبقيت جفوني نائمه لا أريد أن أفتح عيني علي واقع الحياة لا
أريد أن ينتهى اليوم أريد أن أبقى هنا بجانب يوسف إلى أن
يحدث شيئاً لتبدأ قصتنا فنبقى سوياً إلى النهاية...

أشعر بأنفاس يوسف تقترب منى أشعر بأنه ينظر لي،
شعرت بأنامله تتلامس خصلات شعري لتبعدها عن وجهى
ويضعها وراء أذني وتتلامس أصابعه وشمي ويقرأ be strong ثم
يهمس I will be Your Backbone

إسمع نبضات قلوبنا تتنافس سرعتها وكأنهم يتسابقان علي
من يفشى سر صاحبه أولاً

تحركت ملك فأبتعد يوسف سريعاً وفتحت عيني لأجدنى
أمام المنزل ونظر يوسف لي وضحك ثم قال

قولى بقى إنك عايزه تهربي من العزومه ف نمتى

لا أزاى يلا نروح إحنا روحنا ليه

شكلك تعبان بكره نروح بعد ما نتغدي سوا

بكره عندي حفلة بليل خيلنا نبقى نتكلم ونتفق على يوم

تانى



شكرت يوسف علي اليوم وألقيت السلام ورحلت
دخلت المنزل لأجد فريده وأمي يشاهدن فيلماً معاً وأجد
فريده تنظر لي بفضول وألاحظ على أُمي التعب

مالك يا ماما شكلك تعبان

لا يا حبيبتى مفيش

أكيد صدعت من كتر الرغى معها إنهارده ما الهانم سييانا
لوحدنا طول اليوم ورايحه تجيب حاجات للحضانة وتعمل
إجتماعات

إجتماعات ايه!

إنْتِ مجنونه يا بنتي مش روحتي جبتي حاجات للحضانة
وعملتى إجتماع ونزلتي الناس يوم أجازتهم ده إنْتِ وليه مفتريه
اه يا بنتي كان إجتماع متعب جدا الحمد لله خلص علي
خير

ربنا يبارك لك يا حبيبتى أحطلك تاكلي؟

لا يا ماما ربنا يخليكى ليا قومي نامي شكلك تعبان وإنْتِ يا
فريده يلا علي بيتك

تحتاجيني تكلميني من صباح ربنا ودلوقتى قومي إمشى، لا
أنا هبات هنا ومش هسيبك أنهارده



أعلم ان فريده لم تتركني اليوم حتى تعرف ماذا حدث حتى
تسمع ما قاله يوسف،

قامت فريده بعمل كوبان من الشاي ودخلت أنا مع أمي
الغرفة لأطمأن عليها

مش محتاجه حاجه يا ماما؟

لا أنا سيباكي إنتِ لحد ما تحتاجيني

....

براحتك يا حبيبي أنا مستنياكي وواثقه فيكي

إبتسمت أمي إبتسامه خفيفة

يلا إطفى النور وروحي لفريده أكيد قاعده الفضول هيجننها
أكثر ما هي مجنونه أنا هستني لما تحبي تحكي

ضحكت علي حديث أمي هي تعرفني جيدا، تمنيت أن
إحكي لها كل شيء لكن ليس الآن سيأتي الوقت المناسب

دخلت غرفتي، أجد فريده متلهفة

يلا إحكي قالك بحبك أزاي، عملتوا إيه ورحتوا فين

ماقالش حاجه

ماقالش ايه؟

ماقالش بحبك



أتحدث معها وأنا الإحباط يملأني كنت أريد ان يقول، كنت اشغف لسماعها وكنت أتشوق لأقول أنا أكثرأنا أحبك أكثر يا يوسف أنا أريدك، أريد أن أكون زوجتك، أريد أن أصبح أمماً لملك، لا أطيع الانتظار لأشاركك كل شيء أريد أن أشاركك إبتتك ومنزلك وروحك وقلبك أريد أن أشارك همك حتي أن كنت سأحمله وحدي يكفيني أن أراك سعيداً

كان نفسي يتكلم يا فريده وماتكلمش مع إن كل كلامه بيقول أن في حاجة في قلبه ليا بس هو ماقالش حاجه، ماقالش حاجه صريحه تريح قلبي

إحتضنتني فريده ولم تسأل علي شيء آخر تعلم أنني كنت أنتظر وتعلم خيبه الأمل بعد الإنتظار

سيبنى بقي أحكيك عملت إيه مع مامتك أنهارده

هتكوني عملتي إيه أكيد إتكلمتوا في موضوع طارق

الصراحة اه بس هي حاسة إن في حاجه تانية

رن هاتفني برساله من يوسف

*أكيد نمتي ..كنت عايز أقولك قد إيه اليوم فرق معايا وقد

إيه وجودك مهم في حياتنا*

في مساء اليوم التالي جهزت أنا وفريده للذهاب إلى بيت

طارق الجديد لحضور حفل الذي أقامه بفيلته الجديدة إحتفالاً بها



كانت الفيلا كبيره بمسبح وحديقة صمم طارق كل شيء بها
كانت رائعة كان مجهود طارق يظهر في كل ركن

أصر طارق على أنا وفريده أن نشاهد الفيلا أن يأتي معنا
ويجعلنا نرى كل شيء فعله بها تحمسنا لتحمله كان يشعر أنه
خطى خطوة هامه بحياته كان يحلم دائماً بها كان يريد أن يستقر
بفيلا من تصميمه ويتزوج بها

وده غرفه النوم اللي هتجوز فيها لو اتجوزت

إنت عامل غرفتين واحده تقعد فيها دلوقتى وواحد لما
تتجوز؟

اه، كنت بخطط لحاجه بس ماكملتش

دخلنا الغرفة كانت أكبر غرفه بالفيلا كانت حيطانها تتلون
باللون الأسود وتزين بلوحات كثيره وكان يوجد بسقفها فوق
السرير لوحه وكأنها مرسمه لجسدين عاريان بينهم عشق متبادل
كان يفصل حائط صغير بين السرير وغرفه الملابس وبها حمام
وبار كانت متكامله وتطل بلكونها على الحديقة والمسبح

مبروك يا طارق

إبتسم طارق لي وهويقفل باب الغرفة ونزلنا للأسفل
ليستقبل اصدقاءه

نادى طارق على الويتر ليحضر كأسين من العصير لي
ولفريده وكأس ويسكي له



إنت رجعت تشرب من إمتى يا طارق مش وعدتني؟
من فتره يا فريده عادى إنتم بس ال مش مركزين معايا
جاءت فتاه تأخذ طارق من بيننا لترقص معه وبقيت أنا
وفريده جالسين

هو طارق ماله إتغير أوى كده يا فريده؟

طارق بقي حاجه تانية من ساعة ما إتقدملك ورافضتي إنتى
بس اللي بقيتى بعيده عنه من أيام المدرسة وبتعامليله من بعيد
وكأن في خناقه بينكم حصلت أنا معرفهاش إتغيرت معاملتكم
مع بعض زياده عن اللزوم
ليه بتقولى كده؟

طارق بعد ما إتقدملك وكلمتيني قولتلي الحصل وإنك
رافضتي عشان معتبراه اخوكى كلمنى وجالى تحت البيت وكان
سكران على الآخر وقاعد يقول مكنتش أقصد وضيعتها وكلام
مش مترتب وقاعد يقولى شريف السبب أنا مش وسخ وخرف
في الكلام كتير قوى مفهمتش منه حاجه وتانى يوم لما قولتله
اللي عمله قال لى مجبلكيش سيره بس واضح أنه إتاثر من
ساعة ما رافضتي وبيبقي أسوأ من الأول كل يوم

وإنتي ليه مقولتيش ده يا فريده من بدرى؟

عشان مش هيفيد بحاجه وأنا عارفه إنك شايله منه ومتغيره
جامد من نحيته ومتأكده إن ده نتيجة لحاجه هو عمالها عشان



إنّني طبعك مش قلاب ف مش هشيلك ذنب مش ذنبك
وبعدين يعنى إنتِ وحده بالك أنه إتغير ومش واخده بالك من
حاجه تاني
ايه؟

الأوضه اللي إتفرجنا عليها فوق ده كلها زي ما كتتي بتمنى!
تذكرت أنني كنت أخبر طارق دائماً بأنه من سيعمل علي
ديكور بيتي كنت أخبره انى أحب اللون الأسود وأتمنى ان
تكون حوائط غرفتي بهذا اللون وأكسر هذا السواد بلوحات
كثيره وأن تكون بقصر كبير وتطل على حديقة أخبرته بكل هذا
قبل أن يأتى ويطلب يدى للزواج
لا أعلم كيف تجرأ طارق وطلب منى الزواج هل نسي ما
حدث أم تجاوزه

إتصل بي في يوم وهو في غاية السعادة

ياسمين عايز أقابلك؟

خير يا طارق في حاجه؟

لما أشوفك

تقابلت أنا وطارق في إحدى الكافيهات

أنا مش عارف أبدأ منين ومش عارف أقولك إيه ولا عارف

أنا إيه خلانى اتأخر في إنى أتكلم معاكى بس...



أنا بحبك

بحبك من زمان يا ياسمين من أيام المدرسة من أيام ما كنا
بنلعب سوا وإحنا صغيرين من أيام المذكرة والدروس...

طول عمرك إستثناء بنسبإلى الدنيا في كاهه وإنتى الكافة
التانية الكافة الثقيله والمهمة الكافة اللي هفضل أختارها
وأسعى إنى أوصلها

هوانت مدرك إنت بتقول إيه؟ مستوعب وفي وعيك يا
طارق؟؟؟

...

أصل لوإنت نسيت أنا عمرى ما هنسي اللي حصلي وإنت
شوفتة بعينك وسكت أنا مش هنسي يا طارق إنك شوفت
حيوان بيتحشرش بيا وإتكتمت عشان مش واعى وجبان من
القرف اللي بتشربه بتفجرج كأن الحصل عادى وعينك شيفاه
علي طول مش هنسي نظرت عينيك وإنت واقف قدامى
شايبنى خايفة ومرعوبة وإنت قاعدت معاه وكملت وكأن الدنيا
عادى سبتنى أمشي لوحدى وأنا خايفة مع إنك كنت بتوصلنى
وأنا في حالتى الطبيعىة لحد البيت وتقولى بخاف عليكى!!
إنت عمرك ما خفت عليا وعمرك ما حبتني وعمرك ما كنت
سند من بعد الموقف ده بقيت صاحب عادى قريب اه بس
بحكم العشره مش بحكم المواقف، الموقف اللي ظاهره ليا



ياسمين إحنا كنا صغيرين وإنتي عارفة إني كنت شارب،
بتحسيني علي إيه

أنا مش بحسبك يا طارق أنا بس شوفتك بشكل عمري ما
هقدر أنساه ولو كنت إتغفلت عنه عشان العشره فامش هعرف
أنساه وأكمل معك طريق إنت رسمته ومشيته لوحدك من
الأول، للأسف يا طارق الطريق ده مش بتاعى ومتمهدش ليا أنا
إنت فرشته علي زوقك وتفكيرك ومقاسك إنت، خلينا زى ما
كنا أصحاب وإخوات بلاش ندخل الحب بنا، وإنسي الحصل
دلوقتي زي ما نسيت الحصل زمان

تجاوز طارق جرحى وضعفى من الحادث لم يعلم كم
المني ما حدث بالرغم من علم طارق بأن جرحي عارم من
رحيل أبي ويعلم أنه كان أقرب لي من أبي يعلم جيداً أنه كان
الرجل الوحيد الذى له مكانه بقلبي ويعلم ان تربى داخلي
عقدة من صنف الذكور أكملهم إلا هو يعلم أنه كان سند وظل
لي لكن هو من هدم كل هذا

ليت القلوب تعلم نصيبتها من قبل أن تقع ليتها تعلم من لها
بالنهاية حتى لا تُهان أبداً تقع في حب شخص يرفض، وآخر لا
يقدر، وشخصاً يخذل ويبقى قلبك يُكسر ممن أحببته، فلا يفيق
قلبك من الحب ولا يشمل من تحب وفي النهاية نلوم النصيب
نلعه حتى تهدأ قلوبنا..... وملعونه هي قلوبنا بالحب



شعرت بضيق وأخبرت فريده أنى أريد الرحيل من هنا
كانت تنتظر هي مجيئ أدهم صديق طارق في العمل، تقابلت
فريده هي وطارق صدفة في مول تجارى وكان معه أدهم ألقوا
التحية والفرصة السعيدة ورحلوا ولم يتلاقوا مجدداً، ولكن بقا
هو بذاكره فريده، أتمنى أن تكون هي بذاكرته أيضاً

لا نمشى إليه إنتِ هتهزرى أنا جايه عشان أدهم ومش
همشى غير لما أشوفه، إن شاء الله يفتكرني

ولومفتكر كيش يا فريده، ممكن طارق يفكره عادى

لا مستحيل مش هحط نفسي في الموقف ده مع طارق

لم تنهى فريده حديثها حتى دخل أدهم ومعه فتاه جميله
تحتضن يديه ويذهبوا بإتجاه طارق ليباركوا له

يلا يا ياسمين نمشى

لا إستني طيب شوفي على الأقل هيفتكر ولا لا

هستفاد أنا إليه دلوقتى لما أعرف يلا يا ياسمين

تقدمت أنا وفريده في إتجاه الخروج وسمعت طارق ينادي
علينا أنا وفريده وكان واقف معه أدهم والفتاه

إنتم هتمشوا ولا إليه

إزيك يا فريده؟



مدت فريده يدها بلطف وهي تنكر معرفتها به

تمام های، إحنًا إتقابلنا قبل كده؟

إيه يا فريده إنتِ ناسيه لما قبلتك في المول من فتره وأدهم
كان معايا

اه معلش انت عارف يا طارق اني بنسي على طول

بدأ طارق بتقديمهم من جديد

أدهم صاحبي في الشغل وأميره اخته

فريده وياسمين أقرب أصحابي من أيام المدرسة

نظرت لي فريده وهي تضحك وكأنها تخبرني أننا لن نرحل
الآن ومال على طارق قليلاً ويخبرني أن نبقى

ياسمين، أدهم جاي مخصوص لما سأل على فريده وعرف
أنها هت حضر الحفلة خليكم شويه

جلسنا على طاولة ولم يجلس طارق معنا، بقت فريده
وأدهم يتكلمون سوياً فرحة فريده بمعرفتها أن أميره ليست
حبيرة أدهم كما توقعت أنستني ما حدث اليوم طال الحديث
بينهم وشعرت أنا وأميره بملل لم يكن بيننا شيء مشترك
لنتحدث فيه فهي تصغرنا بالسن لم تكن هذه الأجواء ممتعه
لها ولم يكن لدينا الشغف للتعرف



قطعت أميره حديث أدهم وفريده لتخبره أنها تريد أن ترحل
فنظرت لى فريده وأدهم كأنهم يلاوماني على هذا كان كلاهما
مستمعان فهم ينتظروا هذا اللقاء منذ فتره
أنا كمان زهقت يا أميره ممكن نمشى إحنا وخليكوا أنتم
عشان طارق مايزعلش

بس أنا مش معايا عربيه إحنا جاين بعريه أدهم

مش مشكله أنا هو صلك بالعريه

هتعبك معايا احنا سكنين في مدينه نصر

خلاص يا أميره هنقوم نمشي دلوقتي

لا ليه أنا مدينه نصر في طريقي أصلا خليكم enjoy your time

سلمت علي فريده وأدهم وأخذت أميره إلى مدينه نصر
وأنا أبرطم بداخلي بما ورطت نفسى به، لكن يكفى إن تكون
فريده سعيدة وأن تتوافق هي وأدهم

وفي طريقي للعودة أرسلت فريده رساله لى

شكراً، أنا لسه معه ومبسوطه جداً، طمينني لما تروحي

قرأت الرسالة وأنا سعيدة لسعادتها

هاتفت يوسف لم نتحدث اليوم كما إعتدنا

لا أنا لسه بره

في الحفلة؟



لا أنا إدبست في مشوار كده خلصته وراجعته دلوقتي
وبدأت أحكى له ما حدث اليوم بعد فضول منه ومشية
منى وأغلقتنا المكالمة عند وصولي الي المنزل

بقي الحديث بيني وبين يوسف عادياً لفتهه نخرج وتكلم
نتعرف ونقترب أكثر كنت سعيدة بهذا لكن كان يحزنني أنه
يوضح حبه لي بكل موقف وكل كلمه ولكن لا يبسح بشيء
صريح لا أعلم لماذا هل ينقصني شيء؟ لم يجد بي ما يكفيه
هو ومملك؟ لا أعلم كان الإنتظار يقتلني ويطفئ شغفي

صباح اليوم التالي في الساعة السابعة صباحاً في موعد
استيقاظي لأذهب إلى العمل رن جرس الباب والهاتف في
نفس الوقت كانت فريده بالتأكيد ستكون فريده من يأتي في
هذا الوقت غيرها

أفتح لها الباب فأجدها تقفز في حضني

أنا عندي أجدها أخت في الدنيا

وهيقتى عندك أرخم أخت زوج في الدنيا

اه صح عملتي معها إيه شكلها بارده

شكلها بس! سيبك منها إحكي لي عملتي إيه مع أدهم

تعالى المطبخ نحضر فطار وتحكي لى على ما ماما تصحى



بيشتغل مهندس ديكور زي طارق وأبوه وأمه عايشين
وساكنين في مدينه نصر كان خاطب وفسخ بسبب أهل خطيبته
حاسة أنه فرح لما عرف إن أهلي عايشين بره
طيب وطريقته معاكي كانت عامله أزاى؟

كان زوق جداً ووصلني لحد البيت، كان جميل أوى يا
ياسمين وكل حاجه أمبارح كانت جميله، طلب رقمي وأخذت
رقمه وبعثلي أول ما وصل البيت، يشكرك صحيح على
توصيل أميره إنت عارفه بعد ما مشيتوا لاقيته بيقول لى لو أميره
مروحتش مع ياسمين كنت هوصلها وأرجعلك تانى، حسيت
أنه مهتم وعائز يتكلم معايا وغالبا أنا كمان بان عليا الإهتمام

على فكره طارق أمبارح قال لى إن أدهم جه الحفلة
مخصوص عشانك ف أكيد إنت عجباه يا حبيبتى وإنت أصلا
تعجبي أي حد

وضعت قبله على خدها وأنا أحتضنها كنت أعتبر فريده
نصفى الآخر ما يسعدها يسعدني وما تتمناه كنت أتمناه وأكثر لها

أعددنا الفطار ودخلت لأيقظ أسمى وجدتها بالسرير مستيقظة
كانت تسعل بشده

ماما إنت كويسه يا حبيبتى؟

اه يا ياسمين طول الليل عندي كحه جامده تقريبا جالي برد



طيب يا حبيبي قومي أظري معانا فريده هنا وهجيلك دواء
قبل ما أروح الحضانة

كنت أسعد بوجود فريده بالبيت دائماً، كنا كعائله، أمي
وأختي فقط ينقضي أب

دخلت الصيدلية لأشتري لأمي العلاج قبل أن أذهب إلى
الحضانة أخرجت المحفظة من حقيتي فسقطت صورته منها كانت
آخر صورته من مجموعه الصور التي أحتفظ بها داخل محفظتي

كانت تضم المحفظة صورته لأمي وأخرى لفريده وصورته
واحدة تجمعني بأمي وفريده وآخرهم صورته لأبي وهو حاملني
وأنا لم يتعدى عمري شهوراً سرقتها من ألبوم الصور الخاص
بأمي وهي تقوم بقص كل الصور التي تجمعها به لتحرق نصفه
ويبقى نصفها لم ألوم عليها أشعر بثقل ما تحمله بداخلها إن
كانت قادره على أن تغفر الخيانة لم تكن قادره على العفو لتركه
لي وأنا لا يتعدى عمري السنه

حزينة يا أبى ليتك تعلم أثر ما تركته بقلبي ليتك تعلم كبر
إحتياجي لك لم يكن سهلاً أن أتعايش على فقدك وأنت على
وجه الأرض، أسمع من تغضب من أبيها وسوء معاملته لها
ومن مات أبيها وتشتاق له، ومن تتدلل بحب أبيها لها، أسمع
من هنا وهناك ولا أعلم ماذا أشعر تجاهك حتى المشاعر
ليست حاضره مثلك.... تقتلني أنت بغيابك وتميتني إن ظهرت



اليوم عيد ميلاد ملك

ذهبت إلى منزل يوسف ليلاً لنحتفل بملك جهز يوسف كل شيء ولم ينقصه إلا وصولي ليكتمل الحفل، إحتفلنا وأخذت ملك الهدايا لتفتحها ودخلت أنا ويوسف إلى البلكون مكاني المفضل

وقفنا أمام السور دخن يوسف سيجاره وشربت أنا القهوة وتحدثنا عن أمنيته ملك اليوم قبل أن تطفأ الشمع كانت تريد أم

صعب اللي ملك عايشاه ده يا يوسف إحنا بنقي كبار ومش بنستوعب عدم وجود الأهل مابالك ملك إحساسها إيه

تقبلي تبقي أم ليها؟

.....

أعتدل يوسف في وقفته فاعتدلت أنا أيضاً فأصبح واقفاً أمامي قريباً لا يحجزيني وبينه الا بعض الكلمات، نظرت يوسف تربكني كثيراً تتكلم عينيه بكل ما أريد سماعه تقول أكثر بكثير مما أنتظر هل أجد يوسف يشبك يديه وراء ظهري فيحيطني بين زراعيه فأجدي داخل أحضانه وهو يتمم ببعض الكلمات لا أتذكر منها سوى أحبك لتكسر كل المسافات بيننا ليتلاشى كل القلق الذي يسكن بداخلي من الإنتظار

عنقت يوسف شعرت بدقات قلبه وأنا رأسي مستلقي علي صدره كأن يوجد بكل دقه رساله إلى قلبي ليهدأ أشعر بأن يوسف يحتضن جسدي ولكن قلبي من حظي بالاحتواء



شعرت بسكينة لم أكن أعلم بإحتياجي لها إلا بعناقه لم أكن
أعلم يا يوسف بإقتقاري لتلك المشاعر

أنا كمان بحبك يا يوسف

عانقني يوسف أكثر عند سماعي وتراخت قلوبنا بعد
إضطرابها

هتقدرى يا ياسمين؟

علي إيه؟

مافتكريش الموضوع عادى... هتقدرى توجهي الناس وأهلك
بفكره إنك تتجوزي واحد أرمل ومعه طفله

لم يخطر ببالي ما قاله يوسف منذ تعرفي بيه لم يكون هذا
فكرى تجاه أنا فقط أحب يوسف لا يهمني شيئاً آخر لا أبالى
بأن كان تزوج من قبل أم لا، لا أهتم بقول الناس لم ينفعني
أحداً، لا أكثرث إن كنت أنا عذراء وهو سبق له الجواز لا يهمني
إن كان لديه طفله فأنا لا أعلم إن كان الله سيرزقني بنعمه
الأطفال أم لا، بأية حال سيثرثر الجميع أن كان مطلق أم أرمل
أوحتى لم يسبق له الجواز، إن كان غنى أو فقير، أن كان عالم
أو جاهل، سيتحدث الجميع كأننا ننتظر آرائهم وكأن لم تبارك
هذه الزيجة إلا برضائهم الكامل لن يهمني أحد، أستهين بتلك
السخافات، يكفيني أنه لا يعيبه شيء وأن ترتاح له نفسى، لا



أعبأ لأعراف مجتمع يظلم من يشاء ولا يرحم أحد يمشى
أعمى وراء تقاليد بلهاء

ياسمين أنا كنت خايف آخذ الخطوة وأتكلم معاكى عشان
مش متأكد من مشاعرك وعشان مش عارف إنت هتقبلي
الوضع ولا لا بس دلوقتى بعد ما أتأكدت وإنت كمان أطمنتي
مفيش حاجه تخلينا نستنى أنا مستعجل علي إنك تكوني معانا
وعايز ملك كمان يبقى ليها أم عشان مش قادر أستحمل
أشوفها كده أكثر زائد إن أهلي بيضغطوا عليا في الجواز كل يوم
عشان ملك والأهم من كل ده أنا مش عايز أفضى يوم تانى تايه
عنك أنا عايزك تبقى مراتي أنهارده قبل بكره

رن هاتفى وجاءت ملك به من الداخل أخذت منها الهاتف
وذهب يوسف بملك إلى غرفتها لينيمها

الو يا ماما

إنت فين يا بنتي؟

أنا موجوده يا ماما مالك يا حبيبتي؟

وحشيتني يا نور عين ماما تعالي أقعدى معايا

أنا جايه يا حبيبتي جايه دلوقتى إنت وحشيتني أكثر

أنهيت المكالمة مع أمي وذهبت لغرفه ملك قبلتها وتحاورت
قليلاً مع يوسف وأخبرته ان صوت أمي يقلقني كثيراً ف على



الذهب إليها وضع يوسف قبله علي جيبني وسمح لي بالذهاب
بعد وعد منى بأن أطمأنه حين أصل إليها

ركبت السيارة وفي الطريق قمت بالاتصال بفريده لم تجب
علي هاتفها كالعادة

أرسلت لها رساله

فريده كلميني لما تفضى أوتعالي علي البيت علي طول
عايزه أتكلم معاكي

وصلت إلى البيت وجدت أمى في إنتظاري كانت تسمع أم
كلثوم كعادتها ليلاً

حبيبتى يا ماما وحشيتنى أوى

وإنّ كمان يا ياسمين، خير وشك بيضحك وفرحان،
فرحيني معاكي

فاكره يوسف يا ماما؟ يوسف والد مالك اللي حكيتلك
عليها؟

اه طبعاً فكره

أنا كنت معه دلوقتى وطلب يتقدملى وعايز يقابلك في
أقرب وقت

متأكد من القرار ده يا ياسمين؟



أكيد يا ماما... إنْتِ مش مبسوطة؟

خايفه عليكى من المسؤولية

مسؤوليه إيه يا حبييتي بس ده أنا شايله مسؤوليه فوق ال 20
عيل في الحضانة

يا بنتي مسؤوليه الأطفال اللي في الحضانة غير مسؤوليه
بنت فاقدته مامتها وإنْتِ هتكوني ام ليها مش عايزكي تظلمي
أوتظلمي

ما أنا هخلف يا أمي وهبقي أم لأولادي وليها وإنْتِ عارفة
لوحاجة أنا مش قدها عمري ما هدخل فيها

ال يفرحك اعمليه يا ياسمين أنا يهمني تكوني مبسوطة

يعنى يجي يتقدم يا ماما؟

أكيد يا روح ماما، أنا نفسى اشوفك عروسه قبل ما أموت

بعد الشر عنك يا أمي إيه بس السيرة دي

دخلت غرفتي لأبدل ملابسي وهاتفت يوسف لأبشره
بحديثي مع أمي

ماما مستنياك يا يوسف

كنت قلقان أنها ترفض تقابلني

مش هنكر أنها قلقانه من المسؤولية وأكيد هيفرق معها
المقابلة بس خير يا حبيبي ان شاء الله



أقدر أجي امتي؟

بعد بكرة مناسب ليك؟

ده إنت مستعجله أوى

يا سلام هوأنا اللي فضلت أقول عايزك تبقي مراتي أنهارده
قبل بكرة

أنا فعلاً يا ياسمين نفسى نتجوز في أسرع وقت عايز أرتاح
من هم المسؤولية ده مش عارف أشيلها لوحدي أكثر من كده

يعنى ده السبب اللي عايز تتجوزني عشانه بقى

ما لوده السبب كنت أتجوزت بنت عمى يا ياسمين، بس
أنا عايزك إنت

خلاص إن شاء الله الهم ده أشيله عنك قريب، تعالى بكرة
إتغدى معانا وملك معاك أكيد عشان ماما تتعرف عليكم أكثر
وبعد الغداء إتكلم إنت وماما

أغلقنا الهاتف بعد تأكيد المعاد وأكد لى يوسف على
مشاعره تجاهي كان حنون وهويتحدث يملك براءة ملك كان
صادق بكل كلمه يرسم لى حياتنا بعد الزواج سيدللى دلال
الملكات يحتويوني كل ليله ليزيل إرهاق اليوم من جسدي، لن
تنامى يوم حزينه ولا يكسر لكى خاطر، ستكونين رفيقه عمرى
ومالكة قلبي، تستحقين كل هذا وأكثر فإنّ الربح الأكبر
والعوض في الدنيا



في صباح اليوم التالي

بس ده كل الحصل

طب وطارق يا ياسمين هتقوليله إزاي؟

أنا ما كنتش وعدت طارق بحاجه يا فريده ولا عمرى عشمته
إنى هبقى له، طارق من يوم ما حبني وإحنا صغيرين وأنا
رافضه أكون له وكنت صريحة معه من الأول ف مش معقول
هفضل رابطه حياتي بطارق عشان هوبيجبنى الجواز نصيب
وأنا نصيبي مش معه أنا مش واثقة في حب طارق ليا وعمرى
ما كنت مرتاحة في حبه ده، ولا هعرف أشوف طارق زوج ليا
في يوم من الأيام، والموضوع ده منتهي من بدرى أوي، أتكلمى
إنْتِ معه يا فريده

يعنى إنْتِ تتجوزي وأنا ادبس أنا مالي

ما طول عمرك مدبسه معايا إيه الجديد!

طيب إية رأيك ننزل أنا وإنتي مع أدهم ويوسف خلينا
نعرفهم علي بعض
إمتي؟

أنهارة، شوفي يوسف وأنا هكلم أدهم

بعد تحديد الموعد قمنا بالاتفاق مع يوسف وأدهم وتقابلنا
بأحدى كافيها المعادى ليلاً كانت ملك معنا وجلست علي قدمي



ملك إنزلي إقعدى علي الكرسي
لا يا دادى أنا عايزه أقعد مع ياسمين
ملك اسمعى الكلام
في إيه يا يوسف ما تسبها
مش عايز اتعبك!
أنا مش تعبانة

أكمل يوسف حديثه مع أدهم الذى كان يدور حول عمل كل
منهم وبقيت أنا وفريده نتحدث علي تحضيرات يوم غد
وشعرت ملك بالملل وبدأت بالزن والحركة العشوائية
ملك أقعدي كويس متتعبيش ياسمين

لم تبالى بما يقوله يوسف، أشعر أن يوسف يتوتر لوجود
ملك أولشعورها بالملل كان يعتقد أن عليه أن يحمل مسؤوليه
ملك ويهتم بوجودي والإلتباه للحديث مع أدهم لم يكن
مرتاحاً وفاجأة أسقطت ملك كوب المياة علي الطاولة فوقعت
المياة علي هاتفي

إيه يا ملك اللي بتعمله ده هوأنا مش قولت أقعدي
كويس!! عجبك البهدلة دى

تكلم يوسف مع ملك بنبره عالية



في إيه يا يوسف بتزعلق للبنت كده ليه
إنتي مش شايفه اللي بتعمله يا ياسمين؟
ما طبعي يعنى البنت اكيد زهقانه من القاعده كده
وأنا المفروض أعمل إيه يعنى أسيبها في البيت لوحدها
مثلاً!!

تدخلت فريده في الحوار بيني وبين يوسف
خلاص يا جماعه محصلش حاجه لكل ده
بدأت ملك بالبكاء بعد حده حديث يوسف معها وخبأت
وجهها منه في حضنى

قمت من أمامه وأكمل هو حديثه مع أدهم معتذراً لما
يحدث وذهبت أنا بملك إلي إحدي محلات الحلوى للقيام
بإرضائها وبقت فريده معهم

إختارت ملك حلوتها وبعد التحدث معها وأنا أحملها بأن
عليها السماع لما يقوله والدها رجعنا إلي الكافية وحين رأنا
قام بفتح الكرسي لأجلس

إنتِ شايلة البنت ليه يا ياسمين ما تنزليها تمشي وإمسكي
أيدها إنتى تابعه نفسك ليه

لم أقم بالرد إستكفيت بنظره لوم لما يقول وجلست معهم



مالت فريده علي لتتحدث معي بصوت منخفض
ياسمين علي فكرة يوسف خائف أن يكون بيتقل عليكى
بحمل البنت ف ملهوش لازمه الأفش ده
ملك مش حمل يا فريده وأنا مش بحب الإسلام ده مع
الأطفال وإنّ عارفه

سكتت فريده وبعد العشاء قمنا للرحيل وبعد إلقاء السلام
والفرصة السعيدة ذهبت فريده مع أدهم ليقوم بأصالها وذهبت
أنا ويوسف ومعنا ملك ركبنا السيارة وأنا غاضبة منه
هتفضلي زعلانة كده؟

مش زعلانة

يعنى مش زعلانة وده شكلك الطبيعي لا ده أنا أصرف نظر
بقي عن الجوازة دي

قاصدك إيه؟ أنا شكلي وحش؟

أمسك يوسف يدى وقبلها، بهزر معاكي يا حبيبتى مش عايز
أشوفك مضايقة أنا اسف

يوسف أنا مش بحب حد يزعق للبنت ولوحتي مضطر
مبيقاش قدام الناس كدة

سكت يوسف قليلاً وأفلت يدي



دي بنتي يا ياسمين وأكيد عارف أتعامل معاها إزاي

يعنى هي بنتك ومش بنتي أنا كمان؟

أنا مقولتس كده

لا ده معنى كلامك يا يوسف واضح إن أنا الداده اللي هتأكل
وتشرب وتنصف ومليش أي دور في تربية البنت

إنتي بتهزري يا ياسمين! هوأنا مش قادر أجيب واحده تاخذ
بالها من خدمه البنت يعنى! إنتي بتفكري كده إزاي، إنتي عارفه
كويس جداً إن ملك متحسنتش غير لما إنتي إهتيمتي بيها
وعارفه إن دورك معاها ميقلش عن دور أي أم كويسه مع ولادها
ويمكن إنتي عملتي معاها اللي أنا مقدرتش أعمله وعوضتيها
عن أمها الله يرحمها بلاش الكلام الساذج ده إنتي عارفه إنتي
بنسبه لينا إيه

ساذج!!!

ياسمين هوده وقت الجنان الشهري بتاعك ولا إنتي عايزة
تعملي مشكلة من مفيش؟؟؟

....

ضحك يوسف على صمتي وأمسك يدي وأحتضنها، أنا
بقول برده طول عمرك عاقله الجنان ده مش طبيعي



جعلني يوسف الاحظ أنني أتمادى في مشكلة ليس لها أساس، تعصب هو قليلاً علي إبنته ليس أمر كبير لرد الفعل هذا، فعلاً أنه موعد دورتي الشهرية يزيد التوتر والعصبية علي أنفة الأمور ولكن لم يكن هذا السبب لعصبيتي وحدة كلامي يشغل تفكيري عدم وجود أبي في الوقت الذي يتقدم يوسف لخطبتي سيأتي يوسف غداً يجلس مع أمي ويطلب يدي ولكنني أريد أبي أيضاً أريد يوسف يطلب يدي منه ويخبره أبي أنني أغلى من كنوز الدنيا يخبره أنه سيأخذ منه قلبه وإن حاول في يوم أن يأذي قلبه فكأنه أوقع نفسه في هلاك الدنيا أريد سند أبي في هذا الوقت أريده بشدة ولكن لن أبوح بهذا ليوسف لن أجعله يحزن لحزني سأحبس كلامي داخل عقلي وقلبي كما أفعل دائماً سأحرمك يا أبي من مشاعر إحتياجي لك كما حرمتني من وجودك لن تجد شخصاً واحداً يعلمك أنني كنت أحتاجك الكل سيخبرك أن عدم وجودك لم يكن مؤثراً فأنا فتاة من ظهر إمرأه تقوي علي الدنيا وما فيها تقوي علي السيئ وتقوى علي الأسوء وتمر من فوقهم كما أن لم يحدث لها شيئاً

حبيبتى ملك دي بنتك زي ما هي بنتي ونومها في حضنك زي دلوقتي بيخليني أطمئن أن هي مطمئنه ومبسوطة، وكبيرة أوي عندي إن البننت تخاف من زعيقى ف تتخبي في حضنك، لدرجه بتخليني غيران أنا علي طول حينين معها والبننت مدلعه



قوي وإنّ بنفسك عارفة ده، وحب البنت ليكي وفرحتها من
وجودك كل ده أنا واخذ بالي منه وكل ده بيكبرك في قلبي
وعيني يا ياسمين أنا آسف إنّي زعقت أنا كنت مشغول بالكلام
مع أدهم وخايف إن البنت تبقي تعبكي مترعلش

حصل خير يا حبيبي

يلا هوصلك وأروح

لا البنت هتصحي لوسبتها هنا

طب ما تصحي يا ياسمين ما هتطلع وتنام تاني إيه المشكله

هويعني إنت مش عايز آجي معاكم ليه

هرمونات والله أنا عارف الحاله دي، لا يا حبيبتني مفيش

حاجة تعالي نيمها

ذهبنا إلى منزل يوسف وقمت بإدخال ملك إلى غرفتها

وقمت بغطاءها وخرجت إلى يوسف

كده إرتحتي؟

اه

وأنا ميهمنيش غير راحتك، طول ما أنا عايش هيفضل ده

همي الأول والأخير

طيب أنا لازم أنزل بقي عشان ماما سييها لوحدها طول اليوم



كوبس إنك فتحتي الموضوع ده، قعدي عايز أتكلم معاكي
جلست بجانب يوسف علي الأريكة ووضع يده حول كتفي
أنا عارف إنك قلقانه من بكرة وعارف إيه اللي شاغل بالك

إبتسمت وسعد قلبي بكلام يوسف إعتقدت أنه قرأ بعيني ما
أتمني أو أحس بأنني أتمني وجود أبي في هذا اليوم كأى فتاة
ولكن خيب يوسف ظني لأول مرة

إحنا أكيد مش هنسيب ماما لوحدها بعد الزواج بكره بعد
موفقتها إن شاء الله أنا هتكلم معاها إنها تنورنا وتقيم معنا في
البيت عشان متبقيش قلقانه عليها ولا سيبها لوحدها أنا عارف
مكانتها في قلبك

أنا فعلاً ده اللي معصيني بس ماما مش هتوافق تيجي تعيش
معانا بس نعمل محاوله مش مشكلة ولو موفقتش فرق البيت بنا
وبينها كام شارع مش مشكله

أنهيت كلامي مع يوسف وأنا أشعر بخيبة أمل من عدم
معرفته ما يزعجني ولكن أفضل أن لا أسرد له ما بداخلي لا
أريد ان اتحدث عنه أكثر من هذا يكفي أنه يكسر فرحتي بعدم
وجوده فلا فائدة من الكلام،

في صباح اليوم التالي

أنا بس قلقنت أن يكون أدهم إضايق من الحصل



لا يا حبيبتى هيضابق ليه حصل خير ويلا إقفلي التلفون
وقومي روجي إنتِ من الحضانة عشان تلحقي تجهزي

ماشى بس إياكى تتأخري كالعادة أنهارده مش هسامحك
اليوم ده غير أي يوم

مش هتأخر عشان يومى أنا كمان قرب ومنتأخريش عليا
بتهزرى صح! في جديد مع أدهم؟

نطق إمبراح لما وصلني بس حاسه أنه اتسرع شويه ف قلت
الأهل يتعرفوا علي بعض وكل حاجه تيجى في وقتها
طيب وكلمتى أهلك؟

هكلمهم إنهارده وربنا يسهل بابا يعرف ياخذ أجازة وينزل
يقابله

ربنا يتمم على خير يا حبيبتى

يتمملك إنتِ يا ياسمين أنا مستنيه يومك أكثر من يومى
مش مصدقه إن أخيراً حد فكلك عقدتك

طيب يلا روجى بقى وأنا كمان هروح عشان ألحق أجهز،
هستناكى

كانت فريده سعيدة لأجلى كأن اليوم يومها ليس يومى،
الذى مررنا به سوياً جعل صداقتنا أقوى من الأخوة كنا معاً



في كل شيء أسندها في ضعفها وتصلبني في قوتي تواسيني
في حزني وأدعمها في سعادتها، كنا نخطو كل شيء معاً حتى
دمائنا تخالطت عندما قامت بحادث سيارة منذ ثلاثة أعوام
تبرعت لها وبقت في بيتنا ترعاها أمي لأكثر من ثلاثة أشهر
بعد الحادث، لم تخبر عائلتها خوفاً من أجبرها أن تقيم معهم،
عائله فريده بأكملها خارج مصر، تسكن هنا بفردها منذ إنتهاء
دراستها بالجامعة لن يفرقنا شيء في يوم ولا بعدتنا الدنيا
بالرغم من كثرة صداقتها إلا بقيت لها دنيا وبقت لي حياة

جاء يوسف في تمام الساعة السادسة وكانت ملك معه
وجهزت أمي غداء يملأ السفارة بأكملها تعبت كثيراً في تحضير
كل هذا بفردها

تعبت من أجلى يبدو عليها الإرهاق ولكن السعادة بعينها
تغلب التعب

رأت أمي ملك عندما جاءت لم ترضى على ترك يدي
تشبت بي وجلست بجانبني وأطعمتها قبل أن أكل إهتممت بها
كما أفعل ولكن أمي لم تكن تعرف أنها عادتي معها لم تكن
تعرف إنني أهتم بأدق تفاصيل ملك أعاملها كأبنتي ليست إنه
زوجي المستقبلي لم أكن لها يوماً زوجه الأب التي تحن أمام
الناس وتقسوا عليها بمفردهم، كانت ملك سبباً في حبي



ليوسف كانت عامل كبير لنتقرب ولكن لم يكون حبي لملك
مربوطاً بيوسف وكأن الله وضع حب يوسف بقلبي لأعوض
ملك عن فقدانها

جاءت فريده بعد الغداء وألقت التحية وجلست معنا
بالصالون

تحدثنا قليلاً وتعرفت فريده علي يوسف وملك

كانت قادمه ومعها حلوى لملك لتكتسبها فهي من اليوم
إعتبرت أنها خالة ملك وبقي الحديث عادي حتى قامت أمي
بأرسالي أنا وفريده وملك إلى الداخل بحجه إعداد الشاي
نظرت لأمي بتعجب لا أعلم لما تريد أن تنفرد بيوسف لكنني
أعلم جيداً أنها لم تكسر بخاطري دخلت فريده وملك إلى
المطبخ وبقيت أنا خلف الساتر أتجسس علي ما تقوله أمي
ليوسف أو بمعنى أدق أريد أن أسمع رد يوسف على أمي

تحدثنا قليلاً عن عمل يوسف وأهله وزواجه السابق وسألت
أمي عن إن كان لزوجته السابقة أقارب يسألون عن ملك خوفاً
من أن يحدث أي إعتراض من إتجاههم لزواجي بيوسف ولكن
طمأنها يوسف بأن داليا لم يكن لها إخوه ووالديها أشيب لم
يقدروا علي تحمل مسؤوليه ملك ويتصلون من حين لآخر
ليقوموا بالواجب ليس أكثر

إطمني يا طنط أنا عمري ما هاخلي حاجه تأذى ياسمين



يوسف أنا ياسمين بنسالي كل حاجه في الدنيا لو هقول فهي
اللي كانت أمي مش أنا اللي أمها كانت بترعاني وشيلاني جوا
عينها مقدره وعارفه أنا عملت إيه عشانها وقدمتلى مقابل ده وأكثر
وأنا ما كنتش مستانيه مقابل غير أنها تبقي فرحانه، ياسمين أتوجعت
من عدم وجود أبوها ودائماً كانت تقولى أنا يوم ما هتجوز لازم
أحس أن جوزها أب ليها قبل ما يكون زوج عايزه راجل يعوضها
حنان الأب اللي ماعشتهوش عايزه راجل يسندها وقت ما تتكسر
مش تبقي خايفه تتكسر عشان عارفه إن مفيش راجل في ضررها،
ياسمين بنتي كانت بمئة راجل طول حياتها بس أنا متأكدة إن
عمرها ما هتفضل كده علي طول وطالما إخترتك وفضلتك عن
ناس كتير إتقدموا ليها يبقي أكيد شافت فيك أب وزوج وحيب
وأنا يا إبني مش عايشلها العمر كله وصيتي ليك يا يوسف تشيل
بنتي في عينك زي ما هي هتشيل ملك بتك في عينها وقلبها

إرتبك يوسف من حديث أمي لم يكون يتوقع حجم
المسؤولية التي سيوجهها لكن إجابته عليها طمأنتها

أنا مش هوعد وأحلف يا طنط بأني هيشلها في عنيا لأن ده
طبيعي وغصب عنى هيحصل عشان ياسمين ما ينفعش تتعامل
غير كده

بس أنا يكفيني إن هي شايله بنتي ده يخليني أشيلها فوق
رأسى هي عارفه قد إيه المسؤولية كبيره عليا كأب وعارفه ان



دور الأم صعب عليا جداً وأنا عمري ما قبلت ولا هقابل حد
يحب ملك وملك تحبه زي ما ياسمين حبيت ملك وملك
أتلقت بيها، ربنا يقدرني وأكون أب وسند وزوج صالح ليها
يبقى نقرأ الفاتحة وتحددوا معاد الجواز والتفاصيل ال
ياسمين عايزها أنا راضيه بيها

أنهت أمي كلامها فوجدت فريده خلفي تزغرد وتشير لملك
لتسقف بيداها

خرجنا لهم فقام يوسف وأمسك يدي وقبلها ثم قبل رأسي
وإحتضنتني أمي وباركت كانت تبكي من فرط السعادة، قرأنا
الفاتحة وألتقنا بعض الصور وجلست أنا ويوسف لتتفق على
تفاصيل الجواز

طيب تحبي نجيب الشبكة إمتي؟

آخر الإسبوع هيبقى كويس

يوسف هو إنت قولت لأهلك؟

أمال هاجى أقرأ فاتحه وبعدين أقولهم يا ياسمين! إن شاء
الله نحدد معاد تلييس الدبل وتعرفي عليهم يوم الخطوبة إحنا
كده كده خطوبتنا مش هطول وهتتجوز علي طول إنت عارفه
اني مستعجل

إن شاء الله



إنتهى اليوم علي خير إنتهى وبقيت أنا وأمى بالبيت بعد
رحيل ملك ويوسف وفريده

عارفه يا ماما، أنا مش عايزه أي حاجه من الدنيا دلوقتى
غير إنى أنا في حضنك وبس
رن هاتفى كان طارق يتصل
مبروك يا ياسمين

الله يبارك فيك يا طارق هي فريده لحقت تقولك؟

لا فريده مكلمتنيش هي نزلت صورته عندك علي الفيس
بوك، كان نفسي أعرف منك يا ياسمين معرفش بالصدفة
أنا آسفه يا طارق بس أنا فعلاً ماكتتش أعرف إن أنهارده
هتبقني قراءه الفاتحة ماما كانت مستعجله وقررت ده وإحنا
قاعدين كانت قرأه فاتحه علي الإتفاق بس وأكد إنت أول
المعزومين في الخطوبة

إن شاء الله وألف مبروك تاني ربنا يتمم لك علي خير

سيبقى هذا اليوم في ذاكرتي مهما مر من الزمن بعد أن
فقدت الأمل إن يوسف لديه شعور اتجاهي بعد كل خيبه أمل
في كل لحظه أنتظر منه إيضاح وهو يتردد بعد كل تخيب
وإحباط جاء يوسف وأظهر حبه أمام الجميع، يومين
وسيشترى لي خاتماً يربط قلوبنا إلى الأبد، نبدأ حياه جديدة



سويًا، وسأبقى له حتى العسف أسانده ويطمئنني ونخطومعاً
السيئ قبل الطيب، نقع ونهض للسير مجدداً، نشاجر ونود
قلوبنا بعد الصفاء نتجاوز كل شيء سويًا ولكن لن نتخلى، لن
نكسر ولن نجرح سنبقى نجبر حتى نشيب ونتعجز علي أكتافنا
دون ملل

في صباح اليوم التالي عندما جاء يوسف بملك إلى
الحضانة

دخلت ملك إلى مكتبي وهي سعيدة كان حضنها هذه المرة
يختلف عن كل مره

ياسمين دادى قالي أقولك يا مامي، إنت مامي

يا روح مامي إنت

دي أحلى مفاجأة يا يوسف ربنا يخليك ليا حبيبي

لسه في مفاجأة أحلى بليل

بجد؟ مفاجأة إيه قولي

لا طبعاً مش هقول لك... بس عايزك تلبسي حاجه جميله

زيك وهعدى عليكى بليل

إنت مش رايح الشغل؟ مش لابس البادله

اه أجازة أنهارده



اشمعنى؟

عشان أحضرك المفاجأة

واخذ أجازة مخصوص عشانى؟

لومش ليكى هيبقى لمين

قالها يوسف وهو يطبع قبله علي خدى

رحل هو ورحلت من بعده بعدت ساعات لأستعد لمساء اليوم
وأنا بطريقي كنت أفكر أن أشتري ليوسف هديه لأعطيه إياها
كنت أريد إسعاده أريد أن أعوضه عن ما ترك في تلك الفترة

ذهبت إلى متجر الآلات الموسيقية كنت أجهل كل شيء عن
هذه الآلات لم أكون أعرف غير أن يوسف يهوى الجيتار،
سأشتري جيتار جديد له ليبدأ من جديد معي ليبدأ يمارس ما
تمنى إحترافه لن أترك شيء يريده ولم أفعله مهما كان

خرجت من المتجر بعد ساعه من البحث عن ما يناسبه وأنا
لا أعلم إن كان هذا يناسب أم لا تمنيت أن يحبه، كنت أبحث
عن جيتار باللون الأسود كان الشيء الوحيد الذى أعلمه أنه
عاشق لهذا اللون

وأنا اضع الجيتار بالسيارة لاحظت في متجر ملابس للنساء
فستانا أحمر تزين حمالته الرفيعة ببعض الفصوص الصغيرة
تخيلت نفسي به وأنا مع يوسف تخيلت نظرتة الأولى لي وأنا



أرتديه، ذهبت إلى المتجر وقمت بتجربته كان عاري الظهر لم
أتردد ان أرتديه أمام يوسف بالتأكيد سيفتن به قمت بشراء
الفستان وذهبت إلى المنزل

ماما أنا جيت

ليه بدرى كده يا ياسمين؟

يوسف عملي مفاجأة يا ماما ف جيت عشان أجهز

ربنا يفرح قلوبكم

هاتفت فريده لأطمأن عليها

لا يا فريده أنا هبتدى أجهز عشان نزله مع يوسف عملي
مفاجأة

طب وملك هتبقى فين؟

مش عارفه بس أكيد معانا

أوك يا حبيبي أتصورى ووريني الفستان لما تخلصي

في الساعة الثامنة هاتفني يوسف ليخبرني أنه في إنتظاري
أمام المنزل

وضعت شال أسود على ونزلت إلى يوسف

كانت نظرتة لي تسعدني كانت عينيه تغازلني لم أكن أنتظر
أن يعلق تكفيني نظرت عينيه لأعلم كم يراني جميله لا تكذب



العيون مهما كثر الكلام فليقول مهما يقل إن لم آراه بعينه لن
أصدق، تصدق العيون يا يوسف وكانت عينك صادقه، صادقه
بنظرتها وقولها، صادقه بتغازلها وحتى بكائها، كان حبك صادق
يا يوسف وإن لم يكن صادق يكفيني أنى بجانبك يكفيني أن
تتركني أحبك

وقف يوسف أمام منزله ونزل يفتح لي باب السيارة
تشبكت يدي بيده ودخلنا إلى المنزل فتح لي الباب وتنحى
جانباً وهو يشير بيده

كانت الشقة مظلمة إلا من ضوء ضعيف يتمركز فوق طأوله
أعدها يوسف لنا وكانت الشموع مضيئة بأركان الصالة كان كل
شيء مرتب وجاهز أشعل يوسف الموسيقى وأزال الشال من
على وبقيت في حضنه تتناغم أجسادنا علي صوت الأنغام
الهادئة

I found a love for me
Darling just dive right in And follow my lead
well I found a girl beautiful and sweet
I never knew you were the someone waiting for me

قبل يوسف باطن يدي وفتح المقعد لي لأجلس وجلس
أمامي وأخرج من جيبه علبه صغيره لونها أحمر تتمشى مع
لون الورد الذي يتوسط الطاولة قدمها لي وهو يمسك يدي



قبلتها وأنا في ذهول من كل شيء أعده لأجلى كان كل شيء
مرتب وأنيق خلق يوسف من كأبه الشقة جواً عاطفي أشاهدها
كما لم أكن أشاهدها من قبل كان الحب رسم على جدرنها
السعادة

أهدى لي يوسف crown ring به فص الماس وضعه في يدي
وهو يخبرني بأنني سأبقى تاجاً فوق رأسه

أنا بستغنى بيكي عن الدنيا يا ياسمين مش محتاج حد
وإنتِ جنبي

وأنا عمري ما هخليك تحتاج حد وأنا معاك، هي فين
ملك؟

مع فريده

فريده!!

أنا فكرك عارفه، هي كلمتني وقالتلي أنها عرفت منك إننا
هنحتفل أنهارده ف طلبت تاخذ ملك عندها ونعدى عليها بليل
نخذها

لا معرفش أنا كلمتها أطمئن عليها وأخذ رأيها في الفستان ف
عرفت إننا هنتقابل بس مقالتش أنها هتعمل كده

أكيد كانت عايزه تعملها لك مفاجأة، بصراحه أنا قلققت
أتعبها بس كنت عايز نبقى لوحدنا أنهارده



قمت أنا ويوسف بعد العشاء بالإنصال بفريده لنظمان علي
ملك أخبرتنا أنها نائمه وأن لا نشغل بها هي سترعاها حتى نأتي
كان هاتفي أوشك على ان يفصل سألت يوسف عن شاحن
هاتفه، كان بغرفته ذهبت لأبحث عنه في وقت كان يوسف يعد
لنا القهوة

دخلت إلى غرفته فوجدت صورته صغيره لزوجته الأولى
شعرت بغيره ولكن لم أعلق لم يكن لي حق لهذا فقلبي من
أحب رجلاً لم أكن الأولى بحياته فلا لوم عليه بقيت أتأمل
الصورة قليلاً جاء يوسف من خلفي ولاحظ يوسف شرودي
مع الصورة فإحتضني من ظهري وهو يفسر، أنا آسف... الصورة
دي هنا من قبل وفاه داليا وما جاش في بالي أشيلها إلتفتت له
لأكون بحضنه وجه لوجه وهو يميل على قليلاً أكيد ملك
هتحتاج تشوف مامتها في يوم لازم تحتفظ بيها، أنا محتفظة
بصور بابا مع أنه عايش يمكن القدر يجمعني به في يوم لأى
سبب بس عشان أنا معرفش ملامحه غير من الصور

يعنى إنتِ مش مضايقه منها

مش هنكر إنى غيرت شويه بس غيرت عشان كان نفسي
أبقى الأولى بحياتك لكن مش مضايقه

المهم إنك الأخيرة يا ياسمين ولوالدنيا كلها قدامى هختارك
إنتِ، أنا بحبك



قالها يوسف وهويتذوق شفتاي لأول مره ارتعش جسدي
فأحتوى يوسف ظهري بلذة وبقت أطراف أصابعه تتماشى علي
ظهري كريحه تداعبه وهويوشوش بأذني عشقه كانت أنفاسه
القريبة تأثرنى ظل يقبلني ويهمس، حتى إذاب جسدي بين يده
أخذ يوسف بنزع ملبسي وهويتحسس جسدي بإشتهاء إسترخيت
فوق السرير ويوسف يقبلني فقط لم أعي لشيء حتى كف عن
تقبيلي وإستلقى بجانبني يضمني إلى جسده فوضعت رأسي على
صدره وأنا أنعم النظر إلى عروق يده البارزة كنت أتحسسها
وكانى اشعر بحبه لي يركض بين أوردته

يوسف

ينظر لى في سكون

أنا كنت خائفة من اللحظة دى جداً

ليه يا ياسمين إنتى مش واثقة فيا؟

زمان يا يوسف حصلتللى حادثة أفقدتنى الثقة في كل شىء
حتى نفسي أفقدتنى الثقة في إنى قوبة وأقدر على أي حاجة
مخدتش حقى لحد دلوقتى يمكن ده اللي خلانى خائفة من
اللحظه دى مكنتش عارفة إذا كنت هقدر وأفرق ان ده حب ولا
هفضل رافضة ده بس عرفت أن الحب بيظمن، الحب الدايماً
شايفه في عنيك بيظمنى يا يوسف



أوعى تستغل ضعفي في يوم، أنا ضعيفة بين حضنك بس
وإخترتك إنت من بين كل الناس عشان أضعف معك أوعى
تخذلني

اشعل يوسف سيجاره وهو يقول

عمري ما هخذلك، ومش عايز أصبر أكثر من كده يا
ياسمين خيلنا نجيب الدبلة نكتب الكتاب في أقرب وقت

موافقه

كنت متخيل أنك هتضايقي وتقولي نوضب الشقة الأول
والكلام ده

أنا عارفه يا يوسف إنك على إستعداد عملي كل حاجه أنا
مصدقه اللي في قلبك ليا ولوانت مستعجل على إننا نتجوز أنا
مستعجله أكثر إنى أشركك كل حاجه، أنا بحبك معرفش أزاى
وصلت لمرحله الحب دي معاك بسرعه بس أنا قابله بأي
حاجه معاك يمكن عشان متأكدة إنك عمرك ما هتخذلني،
مطمئه يا يوسف ومش فارق معايا غير إنى مطمئه

بكره ننزل نجيب الدبل ونحدد يوم الخطوبة وتعرفني في
علي أهلي ونكتب الكتاب بعدها بفترة قليلة

وفقت يوسف وإستعدينا للنزول لإحضار ملك، ناخذنها من
بيت فريده وعودنا إلى منزلي بقيت معه أمام المنزل



يوسف أنا كمان كنت عامله لك مفاجأة أنهارده
وقفت معه أمام سيارتي وقمت بفتح الحقيبة فظهر أمامه
الجيتار

كانت فرحته بيه شديده أخبرني أنه كان يريد شراءه منذ فتره
وأن المتجر الذي إشتريت منه يتعامل معه دائماً لم أكن أعلم
أنه سيسعد به إلى هذا الحد تردد يوسف في شراء الجيتار
عندما رآه لأنه لم يكن يعلم أن سيأتي وقت ويرجع لممارسه
هوايته كان ينتظر أن يستعيد حياته الطبيعية

إنتِ رجعتيلي فرحتي يا ياسمين

ذهبنا ثاني يوم إلي أحد محلات الذهب المعروفة بالمعادي
لإختيار الدبلة كانت فريده معي وملك وقام يوسف بشراء
الدبلة لي وقمت أنا بشراء خاتماً لملك من إختيارها كان خاتم
صغيراً لها أهديتها به كان يسعد يوسف بإهتمامي بها، أخبره
دائماً ان وجودها بيننا كان سبباً لإرتباطنا لولا ملك لم أكن
تقابلت أنا ويوسف يوماً، ذهبنا للغداء معاً، وقبل الغداء

يوسف عايزه نروح نشترى فستان لملك عشان الخطوبة

عندها يا حبيبتني

يعني إيه عندها! لا طبعاً هجبلها جديد

ما مامتها كانت جايه ليها واحد ولسه ملبستهاوش



يوسف هو انت واخذ بالك بتقول إيه قدام البنت؟

مش قاصد وهي بتلعب مع فريده مش مركزه معانا،
لو حاجه زي دي هتضايقك نجبلها يا حبيبي مش مشكلة

لا يا يوسف أنا بحب ملك مش عشان أنسيها مامتها وأنا
بكمل تربيتها من بعد وفاه مامتها وأكيد لما تكبر هتفهم
الحصل وأن ليها أم كانت بترعاها قلبي وبتحبها زي، بس هي
هتفضل أول بنت ليا ومكانها في قلبي كبير قوي مش هيتغير
مهما حصل

حتي لما تجيبي أطفال غيرها؟

حتي لو عندي أطفال غيرها يا يوسف

بصي يا فريده يمكن لو كنت بتجوز واحدة غيرك كنت هبقي
خايف علي ملك وهفضل كل شوية أحذرها وأقولها عملها زي
بتك وأقلق أسيبها لوحدها معها وهفضل مده علي ما إتظن
إن البنت حبيتها وأنها حبت البنت وعلي إستعداد تشيل
مسؤوليتها بحب مش عشان مضطرة عشان هي مرات أبوها
لكن معاكي أنا واثق أن هتراعيها وتحبها زي بتك وأكثر يمكن
ربنا خلي ملك هي سبب مقابلتنا عشان أظن لحبك ليها قبل
ما أظن من حبك ليا

عمري ما هخذلك، أظن



ذهبنا لشراء الفستاق لملك ومر اليوم سريعاً كانت سعادتي
أنا ويوسف بكل شيء تفوق السماء أوصل يوسف فريده ثم
أوصلني وعاد إلى منزله

وكانت نهاية كل شيء سعيدة في هذا اليوم، تبدلت حياتي
من أسعد إلى أتعس إنسانه على وجه الأرض

كيف يمكن للقدر أن يقلب حياتك في ثواني قليلة تسير
على أرضاً خصبه تنعم بها وفجأة دون أي إشارة تجد رجلك
على رمال متحركة تبتلعك بداخلها فلا تجد فائدة من المقاومة
ولا تجد من ينجذك

وصلت الي البيت وجدت أمي جالسه علي الأريكة رافعه
رأسها لفوق وكانت قطع القطن كثيره حولها مليئة بالدماء
جريت نحوها يرتعب قلبي لا أفهم ماذا يحدث كانت تنذف
أمسكت راسها لأجد حرارتها عالية والدم يسيل منها بصورة
غير طبيعية رميت كل شيء بيدي الشنطة والهاتف

ف إيه يا ماما!!! مالك في إيه؟؟!!

إهدى يا ياسمين ده من الحر

حر إيه يا ماما إنتِ جسمك مولى مش حران

قومي دلوقتي قومي بسرعه نروح المستشفى



تعبانة يا ياسمين وجعني وأنا هيبقى كويسه بكره نروح
صرخت بصوت أعلى بكره إيه يا ماما!! بكره إيه بجد إنـت
مش شايفه نفسك يلا لازم نروح دلوقتي

غطايتها بعباءة وجدتها أمامي وركبنا السيارة وذهبت بها إلى
أقرب مشفى دخلنا إلى الطوارئ وتم الكشف ولاحظت وهي
مستلقيا علي السرير أنها فقدت الكثير من الوزن وجدت
كدامات بجسدها كانت شبه غائبه عن الوعي لا أعلم ماذا
حدث لا أعلم كيف وصل بها الحال إلى ما هي في كانت
بخير لا تشتكى، ستتحسن أمي هي ليس بها شيء ستكون
بخير، هي فقط تعاني من حراره الجوى، ستكون بخير

خرج الدكتور بعد وقت من غرفة الطوارئ

كنت أنتظر ليطمئننى علي أمي

ماما بقت كويسه يا دكتور؟ أقدر أخذها وامشى؟ الحصل ده
من حراره الجوصح؟

للأسف والدتك لازم تتعرض علي دكتور دم إحنا عملنا
اللازم هنا بس ياريت تحجزى لها غرفه والطبيب المختص
هيعدى عليها بعد عمل بعض الفحوصات والتحاليل ويطمنك
عليها خير ان شاء الله

يطمني علي مين يا دكتور؟ هي أمي عندها إيه؟!!



ربنا يطمئنك عليها

أنا مش مستوعبه حاجه ومش فاهمه ومش عارفه أتصرف
أزاي، تايهه وخايفه وعايزه أمي، أنا عايزه أمي تبقي كويسه
ونمشي يارب قويني

ذهبت إلى الإستقبال لحجز غرفه بمرافق

قمت بحجز الغرفة وقام طقم التمريض بنقلها إلى غرفتها

طلبت أمي أن تستريح اليوم وتبدأ غداً بعمل كل الفحوصات
والتحاليل

تبدوا أمامي كورده ذابله تفوح رائحتها بأرجاء الغرفة وكانت
شاحبه ضعيفة تحاول الصمود ليطمئن قلبي لكنها تعلم أنني
لن أطمئن سأظل خائفة وستظل الدموع سجينه بعيني حتى
تتورد أمي مجدداً

بقيت بجانبها حتى نامت وبحثت عن هاتفني لن أجده،
تذكرت أنه بالبيت

كان علي الرجوع لإحضار بعض الملابس والهاتف

تركت أمي بالغرفة ووصيت الممرضات عليها وركبت
السيارة مسرعة حتى لا أترك أمي بمفردها كثيراً

أعددت حقيبة لها ولي وأخذت الهاتف وبعض المال
وتفحصت الهاتف وأنا بطريقي للمشفى وجدت 5 مكالمات



وارده لم أقم بالرد عليهم إثنين من فريده و3 من يوسف وترك
لي رساله طمينني يا ياسمين أنا أول مرة أكلمك ومترديش
قلقتيني

قمت بالإتصال به، تأخر الوقت أتمنى أن يكون مستيقظ

الو ياسمين إنت كويسه؟

الحمد لله يا يوسف الحمد لله علي كل شيء

في إيه يا حبيبتي، ماما بخير؟

لا يا يوسف مش بخير أنا بكلمك وفي الطريق للمستشفى،
أمي تعبت وحجزوها في المستشفى وبكره التحليل هتعملها
ونعرف في ايه

هي بتشتكى من حاجه؟

عمرها ما إشتكت يا يوسف عمرها ما قالت تعبانه دائماً
بتضحك وشايله همى وتعبي وساكته عمرها ما قالت تعبانه

طيب أبعثي لي اللوكيشن أنا جايلك

تجيلي فين يا يوسف دلوقتي أنا اصلا قلقانه أكون صاحيتك

أنا مانتمش أصلا أنا كنت مستني تكلميني وملك طول
اليوم بتلعب ونامت من التعب ف مش هتقلق بليل كده وأنا
هاخذها في العربية وآجي مش هتصحي متقلقيش



أرسلت اليه العنوان لم أجادل يوسف بالرغم من إعتراضي
من أن يأتي بملك لكنني أحتاج له بقربي
وصلت إلي المشفي ووضعت الحقيبة بالغرفة وانتظرت
يوسف في الإستقبال
عودت الإتصال بفريده
فريده

ايه يا بنتي في ايه؟

ماما في المستشفى

مستشفى ايه إنتِ فين أنا جيه لك

لا متجيش هي تعبت وجبتها علي هنا ولسه مش عارفين
في ايه بكره كل حاجه هتبان

طيب يا بنتي إنتِ فين أجيلك ونتكلم ما ينفعش كلام
الموبايل ده

معلش يا فريده ريحيني أنا في حاجه أهم من كل ده عايزها
منك

ايه يا حبيتي

هبعلك مفتاح الحضانة مع يوسف لما يوصل عند بيتك
هيكلمك تنزلي تخدي المفاتيح عايزكى بكره الصبح تنزلي تفتحي



الحضانة وما تخليش أي حد يحس بأى حاجه خليكى فيها إنت
مكانى وبكل الصلاحيات وأنا هكلم نرمين المساعدة بكره
أعرفها ده، معلش هتعبك معايا بكره بس لحد ما أعرف الظروف
ايه وخلصي وقت ما تحبي ونرمين معها نسخه من مفتاح
الحضانة لوفي حاجه هي هتخلص وتقبل هي عارفه شغلها

لم تعترض فريده كانت تود أن أطلب منها كل شيء كانت
تريد أن تساعدني بأي وسيلة

أغلقت الهاتف معها ووجدت يوسف أمامي يعجل بخطواته
ليصل لي وحامل ملك علي زراعية وهي نائمة علي كتفه يفتح
حضنة ليضميني إرتميت في أحضانه كطفله ضائعة في أولى
لحظات فقدانها مرتعبة من كل شيء

إهدى أنا هنا معاكى كل حاجه هتبقى كويسه

أنا هموت لوأمي حصلها حاجه يا يوسف

مفيش حاجه مامتك بس بتعرف غلوتها عندك ما تقلقيش
حد من الدكاترة قالك حاجه؟

لسه بكره بدرى هيعملوا اللازم

خير يا حبيتي خير إن شاء الله

يلا يا يوسف قوم روح عشان ملك وأنا هبقى معاك علي

الموبايل



أطمئن علي وذهب وصعدت إلى أمي وجدتها نائمه كما
تركتها بقيت بجانبها لم أتخيل ان يأتي يوم وترقد أمي أمامي
هكذا ان كنت قويه بما يكفي طوال ال 27 سنه السابقة فكانت
أمي الحافز لهذا كنت قويه بيكي يا أمي فتحسني لأجلى

مسكت المصحف وبدأت بالقراءة لها دعيت الله أن يشفيها
دعيت حتى غفوت وأنا ماسكه يديها

في صباح اليوم التالي إستيقظت علي مكالمه من فريده

أنا رايحه الحضانه بكلمك أطمن عليكى وعلي طنط

لسه صاحية هشوف الممرضة تيجى تعملها التحاليل ادعلها

يا فريده

بدعلها إنت عارفه طنط بنسبه ليا ايه

أغلقت الهاتف ودق الباب دخلت إحدى الممرضات

وواحد من السرفيس تقدم الفطور

أخذت الممرضة كل العينات المطلوبة

وبدأت أنا بإطعام أمي

يلا يا حبيتي كفاية دلع علينا نخرج من المستشفى وأعملك

فطار أحلي من ده مية مره

مش قادره يا ياسمين آكل ماليش نفس



ماما عشان خطري لازم تكلى كويس وحياتي عندك بلاش
كده

بدأت أمي تأكل لقمه والأخرى وبدأت تتعب مجدداً
ياسمين مش قادره وحياة ماما بلاش تضغطي عليا
تركتها كما تشاء لا أعلم ماذا بها هل مرضها هو الذي
يجعلها تفقد شهيتها ام هي لا تتحمل مذاق طعام المشفى
جاء الدكتور المختص (بأمراض دم) وعرفنا علي نفسه
أنا دكتور حاتم متخصص في امراض الدم بعثولي الحاله
إمبارح وأنهارده هناخد عينات يتم تحليلها وأن شاء الله خير
كان لطيف وواجه هادئ بدأ بالكشف ومراجعته التحاليل
التي تم عملها بالطوارئ أمس

لا أعلم ان كان هدوء وجه نتيجة لحاله أمي أم أنه تعود علي
وجود حالات كثيره بيومه الميؤوس منها والبسيطة فيتكلم بهذا
الهدوء

تفحص كل التحاليل جيداً ثم قال
تظهر باقي التحاليل ونقعد ونتكلم ولحد ما نتيجة التحاليل
تظهر لازم تأكلي كويس وهنركب محاليل وفي علاج هتاخديه
قال ما قال دون تفسير وخرج



خرجت خلفه وأنا لا أفهم لم لا يشرح حاله أمي

دكتور بعد إذنك معلش هي ماما عندها إيه؟

انسه...؟

ياسمين

انسه ياسمين أنا شايف إن نستنى التحاليل والإشاعة لحد ما
تطلع عشان نبقي متأكدين من أي تشخيص هنقوله ياريت
تفضللي جنب والدتك وأي حاجه ممكن تحسن نفسيتها هتبقي
كويسه في الوقت ده أول ما نتيجة التحاليل تظهر أنا بنفسني
هاجي أطمئنك

كان وجهه الهادي يجعلني أطمئن لا أجادل كثير أولاً أجادل
خوفاً بأن تكون أمي تشتكي من مرض خطير لا أريد أن أعرف
شيء سوى إن أمي ستكون بخير

دخلت الغرفة لأجد أمي تتكلم في هاتفي

اه يا حبيبي ياسمين جات اهي معاك

بتكلمي مين يا ماما

ده يوسف بيطمن عليا

الو

إيه يا حبيبي طمنيني عليكى وعلي طنط



الحمد لله، الدكتور لسه ماشي بس مقالش حاجه مستني
نتيجة التحاليل

طمني علي ملك عامله إيه؟

صاحبة بتسأل عليكى يا ستي وبقولها إنك مش موجوده
أنهارده في الحضانة قاعدت تعيط بس سكتت لما شافت فريده
هناك

حبيبتي، معلى كل ده هيعدى وأشوفها قريب إن شاء الله
ماشي هسيبك مع مامتك وهعدى عليكى بعد الشغل قبل ما
أجيب ملك

أغلقت الهاتف مع يوسف وجلست جانب أمي قبلت يداها
قلقتيني عليكى يا ماما

متزعلش منى يا بنتي كسرت فرحتك

إيه يا ماما اللي بتقوليه ده فرحتي عمرها ما هتكمل غير
بيكي ربنا يشفيكى ويطول في عمرك يا أمي

مر نصف اليوم بين المحاليل والعلاج والحديث مع أمي
وكان يوسف يتصل كل حين وأخر ليطمئن، وجاءت فريده
بإزعاجها

دخلت وقبلت أمي وهي تتحدث معاها



إيه يا طنط حد يعمل كده
والله يا فريده أنا ما عملت حاجه، ياسمين هي اللي فلقانه
زياده بس

هي طول عمرها كده يا طنط والله متعبه
كنتي بتكلمي مين وسيباني تايهة في المستشفى دي
كنت بكلم يوسف
اه تكلمي إنتِ يوسف وسيباني أنا مع نرمين، صحيح أنا
خصمت لها نص شهر

يخرب بيتك نص شهر! ليه عملت إيه؟
قاعد بلعب مع العيال في الجاردن بتقول لى ماينفesch كده
مش فاهمه كانت جاردن أبوها ولا إيه

ضحكت أمي من قلبها ضحكت كثيرا حتى دمعت عينها
كأنها كانت تنتظر أن تضحك لتسقط دموعها دون أن تظهر ألمها
كأن عينها لا تعترف بالبكاء الحزين فضحكت من قلبها لتخفى
دموع الألم وراء ضحكتها

تركنا أمي لترتاح قليلا كما طلبت وخرجت أنا وفريده
نجلس بالكافيتريا

مسكت فريده يدي



خليكى متماسكه زي ما إنتِ أوعي تضعفي قدام مامتك ولا
حتى قدام نفسك لوضعفتي مش هتعرفي تسنديها

بحاول يا فريده، بحاول علي قد مقدر بس خايفه أوى عليها

طارق كلمني الصبح على فكره وسأل عليكى زي ما بيسأل
دايماً وعرف إن طنط تعبانة وقال هيجى أنهارده وهيكلمك
قبلها ...

انسه ياسمين؟

ايوه؟

الدكتور عايزك في المكتب

ذهبت أنا وفريده الي المكتب كان ينتظرنا الدكتور لم تكون
ملامحه هادئة كما كان من قبل، كان مرتبك وكأن ما سيقوله
سيزيد إرتباكاه

انسة ياسمين طبعاً آسف على اللي هقوله دلوقتي بس لازم
تعرفي بعد مراجعه التحاليل الأولية اتضح إن والدة حضرتك
بتعانى من لوكميميا (سرطان الدم) في مرحله متأخرة والأشعه
أظهرت إن فى إلتهاب رئوي مؤثر علي إنتظام التنفس وللأسف
المناعة ضعيفة مش بتقاوم احنا هنعمل كل حاجه نقدر عليها
وأنا إتكلمت معاكى عشان توصلي لولدتك مرضها بالشكل
المناسب عشان إحنا هنبداً بنقل صفائح دم وهتاخذ جرعات
كيماوي وطبعاً مش محتاج أقولك العامل النفسي مؤثر أزاي



بس يا دكتور طنط ماكنتش بتشتكى من أي حاجة أزاي يبقي
فيها كل ده؟

للأسف المرض ده خبيث مش بيظهر علاماته غير متأخر
أمي هتموت؟

انسه ياسمين الموت عمره ما كان بإيد حد ربنا قادر يشفى
والدتك في أي لحظه

أمسكت فريده يدي والدموع تملأ عينها

ياسمين حبيتي إقوى كده إنتِ لسه هتقول لى لطنط لازم
تبقي أقوى من كده

إرتجف جسدي وتصلب في لحظه كانت الصدمة أقوى من
أن أتقبلها كنت قويه دائماً حتي غزا المرض جسد أمي وكان ما
أصابها أصاب روحي أضعافاً لا أستعب ما يحدث وبقت عيني
تنظر إلى فريده وأنا لا أراها لا أرى أي شيء، يتفوهون هما
بكلمات لا أسمعها لم أكن أسمع غير ضحكة أمي أرى
إبتسامتها أمامي وهي تمسح علي رأسي بقت دموعي تنهمر
بشده وكان عيني تنزف أسى عليها

بقت فريده تنادى اسمي لتعيدني إلى واعبي

قومي يا ياسمين معايا يلا يا حبيتي



تحركت معها وأنا لا اشعر بشيء لا أسمع ولا أرى يتردد
كلام الدكتور بأذني كيف سأخبر أمي بأن حالتها سيئة كيف
سأقول لها أن أصابتها لعنة السرطان ... كيف سأشرح لها
حالتها وأن باقي لها أيام معدودة تحركت بخطوات بطيئة وقلبي
يركض لها أقف أمام غرفتها وأنا بكامل ضعفي لأسندها، كيف
أسندها وأنا محطمه كيف ستستند أمي على وأنا مهشمه هكذا
إنتظرت أمام غرفتها لبضع دقائق وفريده تقف بجانبني تتحدث
إلى يوسف وتتطلب منه المجيء فورا

أجي معاكى؟

سبيننا يا فريده أنا هتكلم معها أنا هقول لها

دخلت إلى غرفه أمي وأغلقت الباب نظرت لي وهي تبسم
كانت إبتسامتها تير وجهها كانت تلمع كنجمة في سماء سوداء
كانت إبتسامتها جميله لا تنتمى لهذا المكان نظرت لي وكأنها
تتيقن أنني علمت بمرضها لكنها تبسم، تبسم كأنها تتحدى كل
هذا كأنها ستنتصر بإبتسامتها علي خبث مرضها لو تعلم كم
أتمنى الموت حالا ولا أن أوجع قلبها بما سأخبرها

ماما

نعم يا ياسمين تعالى قعدي يا حبيبتى مالك؟

ماتسبينيش



وإنفجرت دموعي بلا وعى كبركان قامت أمي لتمتلكني
وهي لا تدرك لما أبكى

اهدى يا ياسمين ماتوجعيش قلبي

أنا اللي موجوع قلبي عليكى يا أمي أنا هموت لوسبتيني
ماتسبينيش أبوس إيدك خليكى معايا، خليكى معايا وأنا مش
هسيك لحظه مش مهم الحضانه ومش هتجوز بس خليكى
معايا يا أمي

فهمت أمي أن مرضها قاتل وعت لما أبكى ولما يصرخ
قلبي خوفاً على فراقها أدركت كم الوجع بداخلى وكانت
السند لى حتى بمرضها كانت تسند كما لم يسندني أحد من
قبل كانت تلتقطني وأنا أسقط من أعلى قمه صدعي

إرضى يا ياسمين عشان ربنا يرضيكى، إرضى يا حبيبتى
وقولى الحمد لله قدر الله وما شاء فعل ربنا مش بيحب
حاجه وحشه، إرضى وأصبرى علي قضاء الله

وإنت يا أمي!

أنا راضيه يا بنتي أنا راضيه بالربنا كاتبه، أنا أطمنت عليكى
ومش عايزه أكثر من كده

إحنا هنا بنقضي رساله يا ياسمين بنقوم بواجب وبنمشي
كلنا، وأنا قومت بوجبي معاكى خلاص، كل إنسان له يوم وأنا



ربنا كتبلي يومي زي ما أتمنيت بعد ما أطمن عليكى عجلى
بجوازك عشان أفرح بيكي يا بنتي وماتبكيش على قضاء ربنا
قولى الحمد لله

أنظر إلى أمي وأنا عيني مغطاه بالدموع أجدها يابتسامتها
كما هي، تمسح دموعي وهي راضيه

طول عمرك قويه ومحبش أشوفك ضعيفة أوعى تقلقيني عليكى
هنتدى علاج يا أمي وهتبقى كويسه هتبقى أحسن من أي
وقت، عشانى يا أمي

إن شاء الله يا ياسمين بطلي عياط بقي وفين فريده مش
كانت معاكى

جاء يوسف ودخلت فريده ومعهم طارق وجلسنا مع أمي
بالغرفة نتحدث وتضحك أمي علي كل شيء كأنها تريد أن
تطمئنني وأنا أعلم أنها تحمل الكثير بقلبها، أعلم أنها ترضى
بقضاء الله ولكن يقلق قلبها على، تتأمل يوسف وتتعشم أن لا
يحزنني في يوم تدعو الله أن يربط علي قلبي، أن يقيها أياماً
قليله حتى تراني بالفستان الأبيض

لا يا أمي والله ما هيحصل جواز غير لما تبقي كويسه

يا ياسمين.... يوسف مستعجل وإنّ عارفه كدة وأنا عايزه
أطمن عليكى يا بنتي



أطمني يا أمي.. يوسف موجود مش هيسبني بس أنا مش
هروح أتجوز وأنا شيفاكي تعبانة الموضوع ده منتهى بنسبه لى

تنظر أمي ليوسف ليتحدث هو، هي تعلم أنه على عجاله
من أمره في الزواج بعد أن حكى لها إلحاح عائلته وإختلافاتهم
الدائمة فى هذا الأمر لأجل ملك

قام يوسف وجلس علي ركبتيه أمامي وهو يمسك يدي

ياسمين أنا مقدر تفكيرك وعارف إنك علي حق وكلنا هنا
عايزين نظمن علي طنط بس هي بتطلب منك طلب واحد ربنا
يديها طوله العمر وتلبسك الفستان بإيدها، خلينا نكتب الكتاب
ونعمل حفله لما ماما تقوم بالسلامة

إنت مستوعب إنت بتقول إيه يا يوسف! أنا مستحيل أعمل
كده ولو مش هتستنى يا يوسف قول لكن أنا مش هعمل ده
حتى لو بطلب من أمي، أنا المفروض أبقي مبسوطة وأنا بتجوز
أتبسط أزاى يا ماما وإنتِ تعبانة مش هعرف يا حبيبتى والله ما
هعرف

قامت فريده من مقعدها وجلست بجانب أمي..

أنا شايفه إن ياسمين عندها حق يا طنط وإحنا الدكتور طمنا
وقال بعد الجالسات هتبقى كويسه إن شاء الله وهنفرح كلنا
بياسمين بس صعب ده دلوقتى ويوسف قاعد اهو هيروح منا فين



قام طارق بتأكيد كلام فريده وأضاف، ماحدث عارف الخير
فين يا طنط يمكن لما نستننى شفاكى بإذن الله يبقى ده الخير

نظر يوسف لطارق بنفور كان طارق يعلم أن يوسف لا يطيق
وجوده بيننا كان يشعر بالغيرة تجاهه وكان طارق يعامل يوسف
على أنه سلب منه شيء يملكه، إعتقد طارق دائماً أنني شيء
خاص به لا يمكن أن يأخذه أحد حتى إن لم يأخذه هو كان
كُتب على أن أبقى بدون زوج لأنى رفضت زواجي منه

أهدأت أمي الوضع بعد موافقتها علي ما أقوله

خلاص يا ياسمين ال يريحك يا بتتي

قمت أنا بتقيل رأسها وإعتذرت ليوسف أمامهم على حده
كلامى، قبل يدى وهو ينظر إلى طارق

ربنا يقوم ماما بالسلامة يا حبيبتى ويجمعنا في بيت واحد
إن شاء الله

إستأذن طارق ورحل ومن بعده يوسف حتى لا يتأخر علي ملك

بقيت أنا وفريده ونامت أمي لتستريح قليلاً

ياسمين أنا عايزه أتكلم معاكي في حاجه يمكن مش وقتها
بس لازم أتكلم معاكي

في إيه يا فريده؟



أنا قلقني إستعجال يوسف على الجواز أنا طبعاً مقدره
ظروفه وحياته الملغبطه بس أنا مش مريحنى وحاسه إن
إستعجاله ده ممكن يعمل مشاكل بذات مع الظروف دي

لا يا فريده ماتلقيش أنا واثقه في يوسف وواثقه إن مش
هيخذلنى أبداً هو أكيد مقدر الظروف، هيفضل جنبى ده وعده ليا

مر اليوم ومر معه أيام قليله وبدأت أمي بأخذ جرعات
الكيمائى وبدأ جسدها يضعف كل يوم لم أكن أشعر أنها
تتحسن، كانت تتألم كل يوم أكثر مما سبق لم تكن حتى قادره
علي أن تطمئني بإبتسامتها، كنت إبتسامتها تتهالك معها
ويتهالك قلبي عليها

لم يتركني يوسف للحظه وكان يأتي بملك من حين إلى
آخر ليعطيني دفعه بالصمود ويعطي ملك أمل بتحقيق ما
تتمني بدأت ملك تنادينى ب ماما كما علمها يوسف وكما
تمنت هي وكما أحب أنا

كنت أضعف ويطمئني هو بوجوده لن أنكر أن تعب أمي يآثر
على كل شيء، يآثر على ملك وعلى يوسف، يآثر على عملي
بالحضانه لكنني لم أقوى على تحسين أي شيء لم أكن قادره
بمراعه ملك ويوسف أهملت الجميع حتى نفسي ولكن زاد
حب يوسف بقلبي علمت أنني أحسنت الإختيار وكانت فريده
تتابع كل ما يحدث كانت تعلم أنها ظنت بيوسف سوئاً لم



يتركني ولم يخذلني بقي بجانبني وتحمل وجود طارق هذه الأيام
تحمل الكثير حتى جاء يوم يشتكى أنه لا يقدر على مراعاة
ملك جيداً كما كنا نراها سوياً وقرر أن يترك ملك في الصعيد
بمراعاة أمه حتى لا يهملني ويتناوب بالجلوس معي هو وفريده
سيغيب ثلاثة أيام ليس أكثر كما وعدني لم يتركني أكثر من
ثلاثة أيام يطمئن علي أهله ويترك لهم ملك ويأتي مجدداً

أنا آسفه يا يوسف... أنا عارفه إن حياتك متلغبطه وإن كل
الترتيبات اللي كنا عملناها ضاعت بسبب تعب ماما، أنا آسفه بجد

بتأسفى علي إيه يا ياسمين ظروفك هي ظروفى والحصل
عمره ما هيغير حاجه كل ده هيتصلح وماما هتقوم بالسلامة
وتشوفك بالفستان زي ما يتمنى دايماً

إن شاء الله يا حبيبي إنت وصلت؟

ه أنا لسه داخل البيت في الصعيد وهطمن عليكى كل شويه
ما تقلقنيش عليكى ماشي ولوفي أي حاجه كلميني في أي وقت

أغلقت الهاتف معه وأنا أنتظر رجوع يوسف منذ أن قرر
السفر لم اتحمس لرحيل يوسف في هذا الوقت كان قلبي
ينقبض دون سبب أشعر كأن حجر يوضع فوق صدري ورثتي
تقوم بوظائفها بتعسر ألتفت وأجد فريده وطارق ينظروا لي
كأنهما أول مره يروني لا يعرفون ياسمين التي تقف أمامهم
هامله نفسها وصحتها تدور بألف دائرة ولا تجد ما مخرج



ياسمين ما تروحي تتراحي شويه وأنا هبات مع طنط
أنهارده

لا يا فريده مش هينفع مش هقدر أسيب ماما أنا مرتاحة هنا
ياسمين إنت لازم تاكلى كويس إنت عايشه علي القهوة
والنسكافيه وشك أصفر وشكلك تعبان
ما تقلقش يا طارق أنا كويسه بكره ماما تقوم بالسلامة وكل
حاجه هتبقي تمام

يلا روحوا بقي وخلصوا شغل بكره وتعالوا، فريده أنا آسفه
أنا عارفه إنى تعبتك في موضوع الحضانة ده ماتشغليش بالك
بيه نرمين واخده بالها من الحضانة كفاية تروحي كل كام يوم
زي ما بتعلمي

عانقتني وذهبت هي وطارق ودخلت أنا الغرفة إلى أمي
أجدها تسمع أم كلثوم كعادتها
إنت مانمتيش يا ماما؟

لا يا حبيتي، تعالى جنبي نسمع أم كلثوم سوآ
جلست بجانبها نستمع لأم كلثوم كانت تطرب أمي دائماً
أمسكت أمي يدى وطفأت التلفاز ياسمين أنا من يوم ما
دخلت المستشفى وأنا عايزه أقولك كلمتين تسمعهم وإياكى
متعمليش بيهم
خير يا أمي



إنّ لازم تبقي قويه ولازم تعرفي إن مهما حصل ماينفعلش
تتكسري ويوم ما هتتكسري الكل هيدوس عليكى أوعى تفقدي
إيمانك بربنا وأوعى في يوم تقولى لقضاء ربنا ليه، الأيام هتبينلك
حكمته وكل حاجه ليها وقتها وخليكى عرفه كويس ان مهما
حصل الوقت قادر يهون وربنا مش يبشيل حد فوق طاقته، عافري
وخدى بالك من نفسك ومهما كان يوسف كويس متأميش لحد
ولوقلبك حب يا ياسمين أوعى تتعلقى لوإتعلقتى هتفضلى ضعيفة
طول عمرك، الحب بيضعف مش بيقوى الحب مش دايماً بينور
عتمة قلوبنا الحب أوقات بيعتم حياتنا كلها أوعى تتوقعى إن
الحياه هتفضل منوره علي طول مع أي حد، أي إنسان في الدنيا
في الحلوفي الوحش ومش كل الناس هتيجى علي نفسها
عشانك، شوفي نفسك من غير ما تأذى حد وأسندى حبيبك من
غير ما تأذى، أوعى تتعلقى لدرجه تخسرك نفسك يا بنتى

ليه بتقولى الكلام ده دلوقتى؟

عشان أنا بحبك وخايفه أموت وأنا قلقانه عليكى

وحياتي عندك يا أمي بلاش سيره الموت دي، ربنا يشفيكى
ويديكى طول العمر

بقيت بحضن أمي حتى النهار لم تتركني هذا اليوم

في صباح اليوم التالي تيقظت على هاتف من يوسف
يطمئن على وعلى أمي



ملك عامله إيه؟

كويسه

وإنت حبيبي؟

الحمد لله يا ياسمين

مالك يا يوسف؟

مفیش

يا يوسف وحياتي أنا مش ناقصه قلق طمني عليك في إيه

شويه إختلافات مع أهلي يا ياسمين عادى يا حبيبتى ما

تقلقيش مفیش حاجه

عشان الجواز؟

.....

يوسف لو الإنتظار ده عبأ عليك قولى ونشوف حل بس أنا

مش عايزه أبقى سبب في خلافات بينك وبين أهلك وكمآن

سايب شغلك

حل إيه يا ياسمين! مفیش حل يا حبيبتى غير إننا ننتظر شفاء

والدتك وأنا لوعليا أستناكى عمرى كله ربنا يعلم أنا مضايق

إزاي وأنا بعيد عنك دلوقتى بس الظروف يا ياسمين أنا آسف

وماتشليش هم أهلي هما بيلحوا بس عشان خايفين على ملك



بس أنا في ظروف يا يوسف غصب عنى ولو أنا مراتك
وفي الظروف دي أكيد كنا هنبقي في نفس الوضع

هما مش بيّفكروا كده يا ياسمين

أمال بيّفكروا أزاي يا يوسف؟

إنتى عارفه ان والدى عايزنى أتجوز بنت عمى ودي كانت
فرسته عشان يفتح الموضوع

.....

ما تقلقيش أنا عمري ما هسيك وعمري ما هقدر أتجوز
واحد غيرك، أنا قلبي إختارك إنتِ وبعدين في مفاجأة
هتفرحك قريب أوى

إيه هي

لا مش هقول لك طبعاً

ماشى حبيبي ترجع لي بالسلامة

أغلقت الهاتف معه وايقظت أمي لموعده جرعه الكيماوي
وذهبت للكافيتريا لإحتساء القهوة بقت شيئاً أساسى بيومي منذ
دخول أمي المشفى كانت مره مثل الأيام التي أمر بها لم يكن
لشيء طعم كل شيء مر وماسخ، هاتفتني فريده لتخبرني أنها في
الطريق إلى المشفى وتساءل إن كنت أحتاج لشيء قبل مجيئها



أستاذة ياسمين

ايوه

بتعذر لك بس والدتك حضرتك تعبت قوى والدكتور.....

لم يكمل الممرض حديثه لم أنتظر منه شيء ركضت إلى
أمي لأجدها مستلقيا على ظهرها والدكتور والممرضات حولها
لم أرى أنفاسها تتحرك أمامي لم يكن بها شيء يوحي أنها
بخير

في إيه يا دكتور أمي حصلها إيه أمي عايشه؟

لم يجيب أحد! لم يجيب الدكتور ولم ينظر لى حتى كانت
الحركة بالغرفة غير طبيعية كل منهم يقوم بعمله ولا يتتبه لى
أحد صرخت من شدة خوفا

أمي فيها إيبه حد يطمني أمي عايشه أمي ماستنيش ردوا

عليااا

أخرجتنى الممرضات من الغرفة بعد أمر الدكتور ووجدت
فريده في ظهري تمسكني وأنا أنهار وأسقط على الأرض

أمي بتمممموت أمي بتموت يا فريده أنا عايزه أمي يارب

أمي لا يارب خدني أنا وهي لا، يا فريده أمي لا

يخرج الدكتور من الغرفة ويقوم بإسنادي مع فريده وأنا في

إنهيار كامل أبكي ولا أسمع شيء لم أقدر على إسناد نفسى



سقطت ولم أفق إلا على صوت يقول والدتك عايشه أحاول
فتح عيني وأنا أتمني ما حدث يكون كابوس ليس أكثر، ما
أسمعه سيكون الواقع، ستكون أمني بخير لم يمسه سوء لم
يقضي عليها السرطان

ياسمين فوقى يا حبيبتى

فريده فين ماما؟

ما تقلقيش ماما لسه في وسطنا هي تعبت بس

أنا عايزه أروحها

أحاول النهوض فأجد يدي معلقه بمحالييل أشعر بالألم في
رأسي وكان الصداق يأكل بها

نأمي يا حبيبتى نخلص المحالييل ونطلع نطمئن عليها

نطلع؟ نطلع فين؟ هي ماما فين

يطرق طارق باب الغرفة في نفس الوقت ويدخل يمشى

بخطى سريعه ويمسك يدي

ياسمين إنت كويسه إيه الحصل؟ فيكي حاجه؟!

أفلت يدي من بين يديه

أطمئن يا طارق أنا كويسه أنا بس عايزه أطمئن علي ماما

ياسمين

.....



طنط في غيبوبة، الأكسجين مش واصل للدماغ ونقلوها
العناية المركزة بس الدكتور طمنا وإدعلها ربنا يقومها بالسلامة
فين يوسف؟

إتكلم وقال كان عاملك مفاجأة وهيجي أنهارده اخر اليوم
بدل بكره ولما عرف الحصل قال هيجي في أسرع وقت
نادى علي حد يفوك اللي في أيدي ده
ماينفعش لازم تخدي جرعة المحلول كامله
فريده لو سمحتي أنا مش عايزه ومش قادره أسمع كلمه
ناديلي حد دلوقتي حالاً

قام طارق بالنداء على إحدى الممرضات بعد أن نظرت له
فريده وسمحت لم يكونوا قادرين علي مجادلتني يعلمون جيداً
أنني في حاله سيئة لا تسمح بالجدال ولا الكلام

خرجت من الغرفة وفي طريقي إلى أمي قمت بالسؤال على
رقم غرفتها وبقت رجلي تخطو خطوة تلوا الأخرى وأنا لا أعلم
لما أنا ذاهبه إليها فلم يسمحوا لي بالتواجد معها لم يسمحوا
بالدخول لها في غير مواعيد الزيارة وحتى إن سمحوا فجاء
اليوم الذي ترقد في أمي ولا تجيب على سأتكلم معها ولم ترد
سأبقى أناديها ولا تقل إبنتي كما تفعل

وصلت أمام غرفتها بالرعاية لم يسمحوا لي بالدخول كانت
الممرضة تجلس أمام الغرفة وغرفه الدكتور بجانب غرفه أمي



إسمحوا لي أشوفها لومن بعيد حتى خلوني أشوف أمي أنا
ملا حقتش أشوفها

كانت كلماتي غير مرتبه وكانت فريده بظهري دائماً كانت
تحاول أن تتماسك حتى لا تنهار معي

تحدثت هي معهم طلبت أن يسمحوا لي برؤيتها ساعدتني
حتى لا أنهار مجدداً

فريده هيفتحوا الستارة من جوا عشان تشوفها عشان
خاطري إستقوى

قاموا بفتح الساتر الذى يفصل بيني وبين رؤيتها والآن
يفصل بيني وبينها فقط زجاج لعين لا أستطيع لمسها أرى أمي
أمامي برقبته كانولا ويدها اخرى وجهاز التنافس على وجهها
وتغلق عينها لا أعلم إلى متى... ياليت أنا من يتألم يا أمي،
ليتني أنا من أرقد مكانك كيف توصيني أن لا أضعف وأنا أراكي
هكذا أنا بكامل ضعفي كل قوتي التي إمتلكتها طول حياتي
تتحول بداخلي إلى إنكسار... أعتذر يا أمي لم أقدر على تنفيذ
أمرك لي طالما أرتبط بوجودك في الدنيا علمتيني أن أقوى على
غياب أبي فكنتي الجميع لأجلى كنت بيت يا أمي دفء في
يوم ساقيع وأمان حين كان الخوف مالكني..

يلا يا ياسمين وقتك هنا مفيش منها لازمه



لم أكن أتكلم مع أحد أشير بيدي وأنا لا أريد التحدث كان الكلام بعقلي أكثر بكثير من أن يقال جاء طارق وتركتني فريده معه لتذهب إلى المطار لتستقبل عائلتها كان هاتفني فارغ شحن بقى مع فريده أنا لم أستطيع أن أعتنى بشيء الآن لم أعلم أين يوسف ومتى سيأتي لكنني في شدة إحتياجي له أحمد الله أنه رزقني يوسف في هذا الوقت سيسندني حتى أصمد مجدداً سأضعف أمامه بلا خوف

ياسمين وجودنا هنا دلوقتي مش مفيد خيلنا أوصلك، تغيري هدموك وتخدى حمام وراجع تاني على الأقل تفوقي شويه

لم أقدر علي القيادة فركبت مع طارق سيارته ووقفنا أمام منزلي كان تأخر الوقت وأنا لا أدري كام الساعة ولا في أي يوم نحن لا أدري سوى أننا في الليل أو النهار من السماء لا أستطيع تحديد أي شيء آخر كان يومي مشوش وكنت شارده دائماً بوضع أمني وإنتظار يوسف أفقت من شرودي علي طارق وهو يضع يده على قدمي ويتمادى بلمسي فرعت مما يفعل وأطرح يده عنى فقبض يدي حتى لا أستطيع معافرتة وتهجم على وهو يخرج من فمه رائحه كريهة وبقى يسب ويلعن يوسف وعلاقتي بيه وأنا أقاوم طارق بكل ما تبقى لي من قوه كان كالخفاش الذى لصق بوجه فريسته ولم يخرج قبل أن يمتص دمائها حولت إبعاده عنى ولم أقدر كنت منهكه إلى



أقصى درجة فبكيت بكيت بكاء هستيري بكيت كما لم أبكى
من قبل بكيت من كل شيء يحدث لي توقف طارق وكأنه
يستعيد وعيه وكأن إستسلامي وبكائي أفاقه مما يفعل كانت
مقاومتي له تجعله يصر أن يصل لي وعند إستسلامي شعر بما
يفعله توقف وهو يعتذر والخوف يقوم بدوره في قلبه وعقلي

أنا آسف والله آسف أنا مش عارف أزاى عملت كده أنا
آسف يا ياسمين

حاول أن يضع يده على كتفي ليطيب خاطري إبتعدت وأنا
أبكى وخرجت من السيارة وأنا أول مره اشعر أنني وحيد كل
شيء فوق رأسي يهدم لم أكن أحتاج سوي يوسف أريد بعض
الأمان بحضنه أفتقد وجوده، دخلت المنزل وأنا أسرع إلى
الحمام أريد ان أمسح بصمات طارق من على ما زلت أشم
رائحة فمه الكريهة كان شارب الخمر أفقده عقله نزلت تحت
الماء وظللت أمسح بجسدي ووجهي كأن أثر ما تركه طارق
على سيمحي بالماء

خرجت من الحمام على صوت الجرس كانت فريده تطرق
على الباب كالمجنونة

فتحت لها وأنا في حاله لا مبالاة لأي شيء كنت ضائعة
دخلت الغرفة لأجهز للذهاب إلى المشفى وهي تمشى خلفي
وتثرثر بحديث لا أسمعه



إيه الحصل مع طارق عشان بيعتلك رساله زي دي فهميني

فريده فين يوسف؟

كلمني على تليفونك بعد ما شحنته وقالى أنه راحلك
المستشفى بس ملاكيش ف كلمت طارق وقال لي أنه
هيوصلك للبيت عشان تغيري هدومك وترجعي تانى
والمفروض إن يوسف يكون هنا من شويه، أنا جيت بعد ما
طارق بعثلك رساله بيعتذر على اللي عمله وأنه كان شارب
ومش عارف عمل كده إزاي ويقولك سيبنى جنبك لحد ما
طنط تبقي بخير ومش هتشوفيه تانى..

فريده أنا رايحه المستشفى روعي إنت لأهلك عشان
ماتسبهمش أول يوم رجوع من السفر

يا بنتي أنا بكلمك بقولك إيه الحصل طمينني عليكى

فين موبايلي؟

أخذت منها الهاتف وحاولت الإتصال بيوسف رفض
المكالمة لا أعلم أين هو أرسلت له رساله يوسف إنت فين أنا
رايحه على المستشفى أنا محتاجه لك

جئت فريده معي ولم يرد يوسف على مكالماتي حاولت
الإتصال به مره والأخرى حتى أغلق هاتفه

دخلت إلى المشفى وذهبت إلى غرفه الدكتور المتابع لحاله

أمي



لم يقل جديد كان الوضع كما هو ولم يسمح لي بالزيارة في غير موعدها ساعه باليوم فقط

مريوم والآخر ولم تفق أمي ولم يظهر يوسف أو يتصل حاولت أن أذهب إلى منزله لكن لم يكن بالبيت حاولت الإتصال به وإرسال الرسائل كان يراها ولا يرد تعجبت مما يفعل لم أفهم إن كان به شيء أو بملك كان القلق ينهش بقلبي خوفاً عليه وعلى أمي، أشتاق لهم لم أتخيل بيوم أن تفقدني الدنيا جميع أحبابي بلحظه، أفقدهم وأفتقدهم، أفقد أيامي السعيدة، أفقد نفسي وقوتي، أريد أن أستعيد كل شيء أريد أن يمضى هذا الوقت لا أريد أن أبقى بمفردي في المنزل أذهب كل صباح إلى الحضانه وأنتظر قدوم يوسف ولا يأتي وأذهب إلى أمي بالمشفى في وقت الزيارة ساعه دون أن تتحسن أو تشعر بي وأعود لأبقي بمفردي من جديد مللت الايام الكئيبة مللت الدنيا بدونهم

حاولت فريده البقاء معي كثيراً لكن بدون فائدة لا أريد التحدث أو الإستماع لأحد

ذهبت إلى أمي كعادتي كل يوم في موعد الزيارة أقف بجانبها ساعه لا أتكلم ولا هي تنظر لي حتى كانت فريده تنتظرنى بالخارج تحاول الوقوف بجانبى وهي تعلم أن لا شيء يسندني وأن قلقي على يوسف ينقلب إلى حزن منه لا أعلم إن



كان بخير لما لا يرد وإن كان يمر بسوء لما لا أحد يرد على
ليخبرني

إنتهت الزيارة وانتظرت أنا وفريده في الإستراحة كنا ننتظر
الطبيب على أمل أن يخبرني بأي تقدم بحالتها

طارق بيكلمني كثير أوى يا ياسمين يسأل عليكي

مش عايزه أعرفه تانى متجلبش سيرة الحيوان ده

عذراكى يا ياسمين أنا مش عارفه إزاي عمل كده

أنا اللي مش عارفه إزاي محدثش بالي أنه سكران

إنّ بتكلمى مين؟

بحاول أوصل ليوסף يا فريده أنا مش عارفه إزاي ساينى

كده أنا كلمته كثير قوى

جربى تانى

حاولت الإتصال بيوسف مجدداً يرن الهاتف كثيراً وأخيراً

ترد ملك

وقفت وأنا قلبي ينبض بسرعه لم أتوقع أن يرد أحد

حبيبتى وحشيتنى إنّ فين وبابا فين يا ملك

بابا مع مامى...



يمر الدكتور من أمامي وفريده تذهب لتتحدث معه وأقوم
خلفها وأنا لا أستوعب ما تقوله ملك

مامي مين يا ملك

دكتور طمنا علي حاله طنط

تتكلم ملك بأذني وأنا أسمعها ولا أركز

طلبني في الرعاية فوق مستعجل لازم أطلع عشان الحالة تدهورت

أغلقت الهاتف وملك تتحدث وركضنا خلف الدكتور إلى
غرفه أمي لم يسمحوا بالدخول لنا

دخل الدكتور ومن بعده ممرضات وأغلقوا الساتر وكانوا
متجمعين حول أمي

فريده...أمي ماتت

بطلي هبل ما الدكتور لسه داخل

والله ماتت يا فريده أنا حاسة بيها أمي ماتت

وقعت على ركبتي وأنا أردد

إننا لله وإننا إليه راجعون إننا لله وإننا إليه راجعون قدر الله
وما شاء فعل

خرج الطبيب من الغرفة في نفس اللحظة يعزى فريده
ويخبرها بأن نقوم بالإجراءات اللازمة وأن الله أراحها مما
كانت به



أراحك الله يا أمي أراحك الله من حرق الكيماوي بجسدك
أراحك من سن الإبر في رقبتك ورقودك بالسريير أراحك الله
من كتم الآلام أمامي قدر الله يا أمي وكتتي إنتِ أفضل من
رضى بقدره، أتى الموت وأخذك من بين أحضاني في ليالي
قليله وسترتاحين يا أمي من اليوم إنتِ بين رحمه الله بعيده
عن هذه الدنيا علمت اليوم أن الموت راحه لكى ليتولاني الله
يا أمي يربط علي قلبي أنا من سيتعذب الموت عذاب للذين
بالدنيا ليس من رحلوا، الله احن عليكم

إتصل يوسف وقامت فريده بالرد عليه أخبرته بكل شيء
وأخبرت طارق وأهلها سيأتي الجميع ليواسوني بموتك أنا
أنهار من كل إتجاه وهم يقولون صبرك الله

صبرني الله علي فراقك على فراق الدنيا بعدك ليصبرني
كما أوصيتني، له حكمه، إن الله اذا أحب عبداً إبتلاه وأنا
إبتلاني الله يا أمي في أكثر شيء يعينني لا أعلم لمن سأعيش
من بعدك ليس لي أحد يحبني مثلك لا فائدة من وجودي
بالدنيا وإنتِ لست بها

بقيت الدموع في عيني وأنا صامته تماماً ليس على فمي
سوى إنا لله وإنا إليه راجعون

أنجز والد فريده كل الإجراءات للدفن وأقف أنا على تغسيل
أمي آراها أمامي تتغسل وتكفن يحجبونها عنى بغطاء أبيض



لا أستطيع رؤيتها مره أخرى آخر لقاء بيها أنظر لوجهك
وهو يتسم كأنها تشعر بوجودي أو تشعر أن الله أراح جسدها،
كنت أشعر بيها تتحرك حولي كأنها تنتظر سقوطي لتسندني
بقت عيني تدور معها بالغرفة وهم يربطون فوق رأسها وأسفل
قدميها كان جسدها ير حل وبقت روحها تحلق حولي

قاموا بدفن أمي وأنا أنظر إليهم وهم يردمون التراب فوقها
أشعر أنهم يردمونه فوقى أنا أسمع الشيخ يقرأ بجانبى وفريده
تحتضن جسدي حتى لا أقع لا تعلم أن روحي دفنت مع أمي لا
فائدة من إسنادك لي يا فريده فإنّ تسندين جسد بلا روح

وساني الجميع وطلبت أن أجلس مع أمي بمفردنا تركوني
ورحلوا وبقيت فريده تتبني من بعيد وأنا جالسه فوق قبرها

أمي .. لن أمضى وأتركك لا تخافي أنا متيقظة هنا فوق قبرك
راجية الله أن أغفولاً جدى بجوارك لا تفزعى من قولى فالدينا
سواكي لا تختلف عن شناعة القبر، سوداء قاتمة راهبة كالبحر
ليلاً ضل الأمان عن مسكنى وتواطن الخوف صارحى، سآحيا
بدونك كالموتى حتى يرحم الله روحي....

رجعنا إلى المنزل وجاءت فريده وأختها ووالدتها معي
يجهزون الشقة لإستقبال العزاء ليلاً وجاء طارق وهو عينه
لا تتقابل بعيني لم يلمس يدي حتى لتعزيتي إستكفى بوقوفه
جانبي وهو يقول «شدي حيلك طنط أكيد متحبش تشوفك كده»



ولا تحب وجودك يا طارق بعد ما فعلته

سكتت فريده وهي تنظر لي كانت تشمئز من طارق بعد أن
علمت بما فعل

سيبها يا طارق دلوقتي هي حالتها ماتسمحش بالكلام وقام
طارق بالسؤال عن يوسف لم أكن أدري أن كان يسأل خوفاً من
أن أكون أخبرت يوسف بما فعله أم يريد أن يجعلني ألاحظ
عدم وجود يوسف وأن طارق هو من بجانبني هذا الوقت ولكنه
سأل عما أريد أن أسأل عنه

فريده هوفين يوسف

ترددت فريده وهي تجيب أعتقد هي جي

تعتقدني أزاي هومش عرف؟

خلاص يا ياسمين يجي أو ما يجيش مش فارقه هو كان فين
طول الفترة الفاتت أصلاً وجوده زى عدمه مش مهم

في إيه يا فريده؟

مفيش

كانت تكذب، كانت عينها تدور حتى لا تنظر لي كانت
فريده تعلم شيء وتخبأه

أغلقت الهاتف وخبأته وراء ظهرها

فريده هاتي الموبايل



مفیش حاجه مهمه فيه قومي إستريحى عشان ربع ساعه
وهتلاقى الناس جايه تعزى

صرخت بها

بقولك هاتى الموبايل

تذكرت ملك وهي تقول بابا مع مامي تذكرت كلامها جيداً
علمت أن فريده تخبأ شيء

إهدى وأنا هحكيلك

تفتح فريده الموبايل وتقوم بفتح الفيس بوك لتجعلني
أشاهد صورة ليوسف مع واحدة لا أعلم عنها شيء يقعدان
علي كرسيين بجانب بعضهم ويديهم دبل الخطوبة

دبلتي ودبلته التي إشتريناها سوياً منذ أيام

كانت صدمتي أكبر من صدمه موت أمي، كنت أتوقع موتها
نتيجة للمرض لكن لم أتوقع إن غياب يوسف كان لخطبته

خطب!

كان فكرك بتخونيه

أخونه!!!!

أنا اللي خاينه! يعنى سابني وسافر يتجوز وأنا اللي خاينه

إهدى يا ياسمين عشان خاطري، يوسف لما إتصل بعد ما
ملك ردت عليكى سألته كان فين طول الفترة اللي فاتت وقال



لى أنه شافك مع طارق في العربية وإن الحصل قبل كده
بيتكرر تانى ورجع البلد عنده وخطب بنت عمه عشان كان
مستحيل يرجع بعد اللي شافه

لما سألته إيه الحصل قبل كدة قالي إنك عارفة

قولتله إن هوفهم غلط وبعته الرسالة ال طارق بعته عشان
يصدق أنه ظلمك وانك كنت منهاره عشان دخول مامتك في غيبوبة
وقال أنه هيجي عشان يعزيكي ويفهمك سوء التفاهم الحصل

سوء تفاهم! أنا مش عايزه أشوفه، كلميه قوليله مايجيش
مش عايزه أشوف وشه

إسمعيه يا ياسمين هوفهم غلط غضب عنه إسمعيه يمكن
تسامحيه

وهوليه ما سمعنيش! ليه مجاش يكلمني ويقولى أنا شوفت
ليه ماعتبنيش سابني ومشى وأنا في عز إحتياجي له

دخل يوسف وأنا أتكلم مع فريده

كان باب الشقة مفتوح لإستقبال المعزين وبقي يوسف أمامي
صامتاً لا يعلم ماذا يقول، لا أنتظر منه قولاً ولا فعلاً فقط أنتظر أن
الزمن يعود أن لا يتركني ويرحل أن لا يخون وعده أن تبقي
صورته أمامي كما أحبته، آراه أمامي كأنه شخص لا أعرفه عشمي
به كان أكبر من أن أصدق خذلانه لى حتى رأيت بيده الدبله



أنا آسف إنـتِ عارفه بعد اللي حصل من داليا أنا كنت
عامل ازاي أنا إفتكرت في حاجه بينك وبين طارق إعذريني أنا
غلطان في حقك

جاي بتأسف والدبلة في إيدك!!

إنـتِ عارفه إن الجوازه دي عمرى ما أتمنتها وكنت رافضها
طول عمرى لكن الموقف خلاني أعمى معرفتش أفكر
يخرج يوسف الدبلة من يده وهو يردد آسف، أعذريني

يعنى إيه أعذرك! أنا كنت هنا بموت من قلقي عليك وإنـتِ
بتتجاوز! مستنياك ترجع زي ما وعدتني عشان بتكسر كل يوم من
قله القوه اللي أنا فيها، مستنياك ترجع عشان أترمى في
حضنك وأستقوى بيك وإنـتِ جايلى إنهادره وأنتِ خاطب
ملبس واحده دبـلتي اللي أنا مختارها وجاي تقول لى آسف!
آسف إيه وإنـتِ بتدى بنتي اللي تعبت فيها لواحد تانية بكل
سهوله تقولها مامي بعد ما كنت مش بتظمن عليها غير معايا
يعني كلامك ده كله كان كذب!!! حرام عليك إنـتِ عمرك ما
شوفت منى أي حاجه وحشه

أقترب يوسف أكثر ومسك يدي والدموع بعينه كثيرة لا
تتحمل عينيه ثقلها فتسقط من عينى الدموع وكأنها كانت
تحملها معه



كانت عينيه صادقه بالرغم من جرحها لى كانت عيون أسفة
حزينة نادمة على تصديقها ما رأت حتى نظرة العيون عمياء وإن
كانت بصيرة، لكنك يا يوسف عميت قلبك وعينك

مكنتش عايز أجرحك عمرى ما كان قصدى يا ياسمين إنتي
أغلى من إنى أوجعك

إنت خدتنى بذنوب داليا وأخذت داليا بذنوب دعاء وجرحتنا
إحنا الإثنين وجاي دلوقتي تجرح واحده من دمك ملهشاش أي
ذنب بالرغم إن كل اللي عملناه إننا حبنك

مش قاصد والله ما قاصد وحياة بنتي ما كنت عايز أضيعك
من إيدي

أنا قبلت بكل حاجه عشانك يا يوسف وقبلت بأقل حاجه
قبلت بالمسؤولية وقبلت بالتعب قبلت إنى ماكنش أول واحده
فى حياتك وإنت جاي تقول لي خاطب! أنا عملت إيه عشان
تعمل معايا كده عملتلك إيه رد عليا؟! أنا عمرى ما زعلتك
عمرى ما جيت عليك ولا قولتلك لا على حاجه، كنت سنديك
زي ما بتقول دايمًا كنت الراحة يا يوسف اللي بتدور عليها أنا
اللي شيلت همك زي ما كنت بتتمنى، أمي ماتت وأنا لوحدى،
ومستنياك ترجع عشان أضعف في حضنك، أزاي جالك قلب
تعمل فيا وفي بتك كده مش كنت بتقول مبقتش كويسه إلا
بيا!! أزاي مؤذى بالشكل ده أزاي أذيتني وأذيت بتك، إنت جاي



ليه! جاي تعزيني في أمي! أمي اللي قعدت معها وقولتلها
ياسمين فوق راسي! بتكسر ضهري أنهارده وتكسر وعدك ليا
وجاي تقولى معلش! أنا أمي لو كانت عايشه عمرها ما كانت
هتسامحك علي اللي عملتوا فيا! إحنا صدقناك إتعشمتنا فيك
وانت مش قد العشم وخذلتنا كلنا انت مش الامان يا يوسف
إنت خذلان مش أكثر إنت زي بابا مافرقتش عنه حاجه
إتعشمت فيك بعد ما خذلني هوجيت إنت دوست عليا
ووجعتنى فوق الوجع مليون وجع، وجاي تقول لى آسف
أعذرينى، إمشى يا يوسف إمشى روح لخطيبتك أنا مش ناقصه
وجع أنا مش عايزك ولا عايزه أشوفك تانى

تركت الجميع ورائى ينظرون لي بشفقة ودخلت غرفة أمي
وأغلقت الباب خلفي ووضعت وجهى بالوسادة حتى لا يسمعني
أحد ثم صرخت كانت الصرخة تخرج من قلبي كنت أبكى
وأنا أنادى أمي لتأتى تمسح على رأسى ولكن بلا جدوى ولا
فائدة لن تأتى ولن يرتاح قلبي

مرت الأيام بمرها وليس بحلوها لم يكن بها حلو كانت مره
وحزينة كانت أقضي الأيام وحيدة حتي تأتي فريدة كل كم ليلة
تتكلم وتواسي لكن الحزن كان يسيطر عليها ماتت أمها الثانية
وتأجلت مقابلة التعارف بين أدهم وأهلها بالرغم من إصراري
على أن تكمل طريقها وكأن كل شيء طبيعي إلا أنها رفضت



كانت تأتي هي يوم ويوم آخر هي وأدهم نجلس سوياً لم
يكون متضرر مما حدث من تأجيل وتقبل بصدر رحب ويوم
الأربعين بعد زياره أمني بالمدفن قرر أدهم أن يصطحبني أنا
وفريده إلى أحد الكافيهات تغير جوليتحسن حالي قليلاً وكان
هذا السبب الظاهر ولكن في باطنه يوسف

دخلت الكافيه وجلسنا وبدأوا الحديث عنه

يعني مفيش أمل تسامحي يا ياسمين؟

لا يا أدهم مستحيل

بس إنتي لسه بتحبيه؟

عارفه يا فريده أنا لوفي إيدي أختار آخر يوم في حياتي
هختار أفضيه في حضن يوسف حتي لو حضنه مش دايم كفايه
أن ألاقى فيه راحتي لولثانيه أنا روعي تعبانة لدرجة إني بدور
علي ثانية واحده أرتاح فيها

طب ولية مش عايزه ترجعي طلما راحتك معه؟

عشان ساعتها الراحة هتبقى مؤقتة والخوف هو اللي هيفضل
ملازمني طول حياتي هفضل خايفة من غدره خايفة من قلة
ثقتي في حبي، لو كان قلبه مش أعمي كنت رجعت وسامحت
لو كان شك من اللي شافه ومخدش خطوة الخطوبه وجيه
أتكلم معايا كنت قولت حقه لكن هو خد قلم وقرر يرد القلم



مىة طعنة فى قلبى وميعرفش إن وقت ما كان بياخد القلم كنت
باخد أنا أكبر خبطة على دماغى

بس إنت ممكن تسامحى يا فريده هوندمان وكلنا بنغلط

غلط عن غلط بيفرق يا أدهم فى غلط ممكن تعديه عشان
عارف إنك هتنسأه لكن غلط يوسف ميتنشى هيفضل معلم
فى قلبى عشان هو أكثر واحد عارف إن الحصل ده صعب علىا
وعارف إنى عمرى ما هاسمح بى ده زى طارق عارف ان اللى
عمله غلط كبير بس بيتحجج بالشرب، هما الإتنين آذونى
وهما الإتنين غلظهم مش هايتغفر وهما الإتنين وجعونى فى
أكثر وقت أنا محتاجه ليهم فيه

أنا مش عارف طارق إزأى عمل كده! من كتر ما هوزعلان
على اللى عمله معاكى على طول شارب ومخدرات ومهمل
فى الشغل وحياته بتدمر

مخدرات!!

أنا فكرتكم عارفين يا فريده

أنا أول مره أعرف إن طارق بياخد مخدرات

هو اللى دمر حياته بإيده حتى بعد الحصل من الشرب زمان
ودلوقتى مبطلش هيفضل مدمن كحل ودلوقتى بقى مدمن
مخدرات لحد ما هيدفن نفسه وهو عايش



زمان؟ زمان ايه يا ياسمين؟

مفيش يا فريده، أنا تعبت ومحتاجه أروح أرتاح شويه

أنهيت الحديث معهم وتركتهم ليكملوا جلستهم للإتفاق
علي تفاصيل المقابلة المؤجلة

ذهبت الي منزلي لابقى وحيدته كما تعودت في الفتره
الاخيره وبقى حياتي بهذا الحال انم يومياً واصحو علي صوت
الحزن بقلبي كما هو لا ينقص منه شئ ولا يتلاشى كما تلاشي
الفرح يبقي قلبي حزين وكأن الحزن إشتري قلبي ليسكن به الي
الأبد لا يزوره الفرح ولا حتي البسمه ومضت الأيام ومضي
ثلاث سنوات يا أمي وأنا أقف فوق قبرك كل سنه أقص لكى
كل ما حدث أشكى لكى مجيئ يوسف لي ليستسمح قلبي
ليغفر، لن يغفر قلبي ولم يتوقف عن حبه

أنحني كل يوم لألتقط ما تبقى من قلبي فأجدني أسقط
مجدداً في خيبتى به

تمضى الأيام ويزيد ما في قلبي لك من حب وأسى بقى
حبنى لك كالسجن لا أستطيع الخروج منه ولا يمكنني التعايش
معه، كان خذلانك لي هوسجاني يا يوسف، تعشمت أن ترمم
قلبي من كسر أبي له، تمنيت أن تبقي بجانبى للنهائة كما
وعدت لكنك كتبت النهائة قبل أن تبدأ الرواية....



قرأت الفاتحة لها والتقت حقيبتني والتفتت ففرغت من
رجل يقف بالخلف لم أشعر بوجوده، يقرأ الفاتحة لأمي
إقتربت لتتضح ملامحه أكثر، أسمع أنين بكائه، واقفة أمامه
فإتضح وجهه صدمت حين عرفته تراجع للـخلف وأنا في
إندهاش كأن من يقف أمامي شبح ليس رجل حتى إقترب مني
ووضع يده على كتفي وهو يعتذر

بابا!





للتوزيع والنشر